



柳田文庫
文庫11
D 303
63









賢固守城破率親丁鏖戰城南與參將張旆俱死部將  
二十人兵民萬餘殲焉世賢駐驍陽聞變疾馳出塞得  
首功百五十有四級進副總兵明年楊鎬四路出師世  
賢副李如柏出清河劉綎深入中伏勸如柏往救不從  
綎遂覆歿尋擢都督僉事充總兵官駐虎皮驛鐵嶺被  
圍世賢馳援城已破邀獲首功百餘級泰昌元年九月  
連戰灰山撫安堡獲首功二百有奇當是時四方宿將  
鱗集遼左率縮脛不敢戰獨世賢數角鬪有功同列多  
忌之移鎮瀋陽經畧袁應泰下納降今廣寧總兵李光  
榮疑世賢所納多以狀聞巡撫薛國用亦奏三可慮兵

部尚書崔景榮請拒勿納而置已納於他所然世賢所  
納卒不可散同列遂謗其有異志天啓元年三月我  
大清以重兵薄瀋陽世賢及總兵尤世功掘塹濬壕樹  
大木爲柵列楯車火器木石環城設兵守城法甚具  
大清先以數十騎來偵世功兵躡之殺四人世賢勇而  
輕嗜酒旦日飲酒率親丁千出城逆擊期盡敵而反  
大清兵佯敗世賢乘銳進倏精騎四合世賢戰且却抵  
西門身被十四矢城中聞世賢敗各鳥獸竄而降丁復  
叛斷城外吊橋或勸世賢走遼陽曰吾爲大將不能存  
城何面目見袁經畧乎揮鐵鞭馳突圍中擊殺數人中



矢墜馬而死世功引兵援亦戰死世功亦榆林人萬曆  
中舉武鄉試歷瀋陽遊擊張承應之敗也世功脫歸坐  
褫職經畧楊鎬言其身負重傷才堪策勵乃補武精營  
遊擊鎬四路出師世功隸李如柏麾下得全尋以副總  
兵守瀋陽熊廷弼代鎬愛其才與副將朱萬良並倚任  
廷弼罷袁應泰代議三路出師用爲總兵官未行而瀋  
陽被兵死於戰贈少保左都督增世廕三級再廕指揮  
僉事世襲賜祭葬建祠曰愍忠世賢既歿或疑其叛降  
恤典故不及四川副使車樸爲訟寃格衆議不果  
童仲揆南京人舉武會試歷都指揮掌四川都司萬曆

末擢副總兵督川兵援遼與同官陳策並充援勤總兵  
官熹宗初立經畧袁應泰招蒙古諸部處之遼瀋二城  
仲揆力諫不聽明年天啓改元應泰欲城清河撫順議  
三路出師用大將十人各將兵萬餘仲揆策當其二未  
行而

大清兵已逼瀋陽兩人馳救次渾河遊擊周敦吉曰事  
急矣請直抵瀋陽與城中兵夾擊可以成功已聞瀋陽  
陷諸將皆憤曰我輩不能救瀋在此三年何爲敦吉固  
請與石砮都司秦邦屏先渡河營橋北仲揆策及副將  
戚金參將張名世統浙兵三千營橋南邦屏結陣未就



大清兵來攻却復前者三諸軍遂敗敦吉邦屏及參將  
吳文傑守備雷安民等皆死他將走入浙兵營被圍數  
匝副將朱萬良姜弼不救及圍急始前一戰即敗走  
大清兵盡銳攻浙營營中用火器多殺傷火藥盡短兵  
接遂大潰策先戰死仲揆將奔金止之乃還兵鬪力盡  
矢竭揮刀殺十七人

大清兵萬矢齊發仲揆與金名世及都司袁見龍鄧起  
龍等並死焉萬良既遁經畧將斬之乞勦罪自效及遼  
陽被攻果陷陣死自遼左用兵將士率望風奔潰獨此  
以萬餘人當數萬衆雖力絀而覆時威壯之事聞贈策

少保左都督增世廕三級再廕本衛指揮僉事世襲賜  
祭葬建祠曰愍忠仲揆贈都督同知增世廕三級祠祀  
金起龍贈都督僉事增世廕三級附祀名世先有罪繫  
獄尚書薛三才薦其善火器命從征立功文傑亦先禡  
職及死並得復官贈三級增世廕二級見龍等皆予贈  
廕他副將至把總戰死者百二十餘人贈廕有差敦吉  
先爲四川永寧參將永寧宣撫奢效忠卒子崇明幼其  
妻奢世統與妾奢世續爭印相攻者十餘年後崇明襲  
職世續猶匿印不予都司張神武與敦吉謀盡掠其積  
聚子女禽世續以歸其部曰閻宗傳怒以求主母爲名



大掠永寧赤水普市磨泥數百里成邱墟事聞敦吉神武並論死遼東告警命敦吉從軍自效及是鏖戰死贈卹如制神武新建人萬曆中舉武會試第一授四川都司僉書既論死遼左兵興用經畧袁應泰薦詔諭從征立功神武率親丁二百四十餘疾馳至廣寧會遼陽已失巡撫薛國用固留之不可曰奉命守遼陽非守廣寧也曰遼陽歿矣若何之曰將以殲敵曰二百人能殲敵乎曰不能則死之前至遼河遇逃卒十餘萬神武以忠義激其帥欲與還戰帥不從乃獨率所部渡河抵首山去遼陽十七里而軍將士不食已一日遇

大潰兵疾擣奮擊孤軍無援盡歿於陣監軍御史方震  
稱繪神武像率將士羅拜爲文祭之詔贈都督僉事世  
廕千戶立祠祀之又有楊宗業梁仲善者皆援遼總兵  
官宗業歷鎮浙江山西楊鎬四路敗後命提兵赴援至  
是父子並戰死仲善亦戰死遼陽城下宗業贈都督同  
知世廕千戶仲善贈都督僉事增世廕三級並從祠附  
祀  
羅一貫甘州衛人以參將守西平堡遼陽陷西平地最  
衝一貫悉力捍禦巡撫王化貞言於朝加副總兵時化  
貞駐廣寧經畧熊廷弼駐右屯總兵劉渠以二萬人守



鎮武祁秉忠以萬人守閭陽而一貫帥三千人守西平  
已定議各繕陁堅壘急則互相援違者必誅明年正月  
大清兵西渡河經撫戒勿輕戰兵漸近參將黑雲鶴出  
擊一貫止之不從明日雲鶴戰敗奔還城追兵殲焉一  
貫憑城固拒用礮擊傷者無算一貫不從又明日騎益衆  
大清樹旗招降且遣使來說一貫不從又明日騎益衆  
環城力攻一貫流矢中目不能戰火藥矢石盡乃北面  
再拜曰臣力竭矣遂自剄都司陳尚仁王崇信亦死之  
化貞知城未下信遊擊孫得功語盡發廣寧兵以得功  
及中軍遊擊祖大壽爲前鋒令會秉忠赴援廷弼亦遣

使督梟進戰遇

大清兵於平陽得功懷異志欲引去乃分兵爲左右翼  
稍却推渠秉忠前渠等力戰頗有殺傷得功及副將鮑  
承先走後軍見之亦奔遂大潰渠戰死秉忠被二刀三  
矢家衆扶上馬奪圍出創重卒於途副將劉徵擊殺十  
餘人乃死大壽走覺華島得功遂降越二日廣寧卽破  
事聞贈一貫都督同知世廕副千戶渠秉忠少保左都  
督增世廕三級再廕指揮僉事皆賜祭葬建祠並祀一  
貫子俊傑承廕崇禎中仕至宣府總兵官免歸李自成  
犯甘州城陷死之渠京城巡捕營副將也以御史楊鶴



薦擢總兵官援勦遼東遼陽被圍廣寧總兵李光榮不能救反斷河橋截軍民歸路總督文球劾罷之卽以渠代西平告急帥鎮武兵往援遂戰歿秉忠陝西人萬曆四十四年爲永昌參將銀定反青以二千餘騎入塞秉忠提兵三百拒之轉戰兩晝夜援軍至始遁秉忠追還所掠人畜邊人頌之擢涼州副總兵經畧袁應泰薦其智勇令率私卒守蒲河至則遼陽已破命爲援勦總兵官駐防閭陽援西平竟死自遼左軍興總兵官陣亡者凡十有四人撫順則張承蔭四路出師則杜松劉綎王宣趙夢麟馬林瀋陽則賀世賢尤世功渾河則

童仲揆陳策遼陽則楊宗業梁仲善是役渠與秉忠繼之朝端卹典俱極優崇而僨軍之將若李如柏麻承恩輩竟有未膺顯戮者

滿桂蒙古人幼入中國家宣府稍長便騎射每從征多斬馘軍令獲敵首一子一官否則賚白金五十桂屢得金不受職年及壯始爲總旗又十餘年爲百戶後屢遷潮河川守備楊鎬四路師敗薦小將知兵者數人首及桂後守黃土嶺爲總督王象乾所知進石塘路遊擊喜峯口參將天啓二年大學士孫承宗行邊桂入謁壯其貌與談兵事大奇之及出鎮山海卽擢副總兵領中軍



事承宗幕下文武輻輳獨用桂桂惟魯甚然忠勇絕倫  
不好聲色與士卒同甘苦明年承宗議出關修復寧遠  
問誰可守者馬世龍薦孫諫及李承先承宗皆不許袁  
崇煥茅元儀進曰滿桂可但爲公中軍不敢請耳承宗  
曰既可安問中軍呼桂語之慨然請行世龍猶疑其不  
可承宗不聽卽日置酒親爲之餞桂至寧遠與崇煥協  
心城築屹然成重鎮語具崇煥傳中時蒙古部落駐牧  
寧遠東鄙遼民來歸者悉遭劫掠承宗患之四年二月  
遣桂及總兵尤世祿襲之大凌河諸部號泣西竄東鄙  
以寧拱免炒花宰賽諸部陽受款而陰懷反側桂善操

縱諸部咸服歲省撫賞銀不貲初城中郭外一望邱墟  
至是軍民五萬餘家屯種遠至五十里承宗上其功詔  
擢都督僉事加銜總兵承宗乃命典後部與前部趙率  
教相犄角督餉郎中楊呈秀侵尅軍糧副將徐漣傲之  
變圍崇煥署憚桂家卒勇猛不敢犯結隊東走桂與崇  
煥追斬首惡撫餘衆而還六年正月我  
大清以數萬騎來攻遠邇大震桂與崇煥死守始攻西  
南城隅發西洋紅夷礮傷攻者甚衆明日轉攻南城用  
火器拒却之圍解帝大喜擢都督同知實授總兵官再  
論功加右都督蔭副千戶世襲桂疏謝竝自敘前後功



優詔褒答再進左都督桂初與率教深相得是役也怒其不親救相責望帝聞之下敕戒勉而崇煥復與桂不和言其意氣驕矜謾罵僚屬恐壞封疆大計乞移之別鎮以關外事權歸率教舉朝皆知桂可用慮同城或饋事遂召還督師王之臣力言桂不可去而召命已下又請用之關門崇煥皆不納閏六月乃命以故秩僉書中軍府事未幾崇煥亦自悔請仍用之臣言帝可之命桂掛印移鎮關門兼統關外四路及燕河建昌諸軍賜尚方劍以重事權七年五月

大清兵圍錦州分兵畧寧遠桂遣兵救被圍笨籬山桂與總兵尤世祿赴之大戰相當遂入寧遠城與崇煥爲守禦計俄

大清兵進薄城下桂率副將尤世威等出城迎頗有殺傷桂亦身被重創捷聞加太子太師世祿錦衣僉事及崇煥休去之臣再督師盛推桂才請仍鎮寧遠會蒙古炒花諸部離散桂與之臣多收寘之麾下桂已嗣位詔之臣母蹈袁應泰王化貞故轍竝責桂阿之臣意桂遂請病乞休不允崇禎元年七月言官交劾之臣因及桂之臣罷桂亦召還府適大同總兵渠家楨失事命桂代之大同久恃款弛備插部西侵順義王遂入境大



掠家楨及巡撫張翼明論死插部遂挾賞不去桂至徧  
閱八路七十二城堡邊備大修軍民恃以無恐明年冬  
十月

大清兵入近畿十一月詔諭勤王桂率五千騎入衛次  
順義與宣府總兵侯世祿俱戰敗遂趨都城帝遣官慰  
勞犒萬金令與世祿俱屯德勝門無何合戰世祿兵潰  
桂獨前鬪城上發大礮佐之悞傷桂軍桂亦負傷令人  
休甕城旋與袁崇煥祖大壽並召見桂解衣示創帝深  
嘉歎十二月朔復召見下崇煥獄賜桂酒饌令總理關  
寧將卒營安定門外桂驍勇敢戰所部降丁間擾民桂

不能問副將申甫所統多市人桂軍凌之夜發矢驚其  
營有死者御史金聲以聞帝亦不問及大壽軍東潰乃  
拜桂武經畧盡統入衛諸軍賜尚方劍起出師桂曰敵  
勁援寡未可輕戰中使趣之急不得已督黑雲龍麻登  
雲孫祖壽諸大將以十五日移營永定門外二里許列  
柵以待

大清兵自良鄉回明日昧爽以精騎四面蹙之諸將不  
能支大敗桂及祖壽戰死雲龍登雲被執帝聞震悼遣  
禮部侍郎徐光啓致祭贈少師世廕錦衣僉事襲陞三  
級賜祭葬有司建祠孫祖壽字必之昌平人萬曆中舉



武鄉試授固關把總天啓二年歷官署都督僉事爲薊  
鎮總兵官孫承宗行邊議於薊鎮三協十二路分設三  
大將以祖壽領西協轄石匣古北曹家牆子四路駐遵  
化而江應詔領東協駐關門轄山海關一片石燕河建  
昌四路馬世龍領中協駐三屯營轄馬蘭松棚喜峰太  
平四路經畧王在晉總督王象乾僉謂永平設鎮本以  
衛山海今移之三屯則去山海四百里於應援爲疎遵  
化去三屯止六十里今並列兩鎮於建牙爲贅請令世  
龍仍鎮永平以東協四路分隸世龍應詔而以中西二  
協專隸之祖壽仍鎮三屯章下兵部署事侍郎張經世  
如言承宗堅執如初乃命祖壽移鎮遵化七年錦  
州告警祖壽赴援不敢戰被劾罷歸及是都城被兵散  
家財招回部曲從滿桂赴關竟死贈卹如制祖壽初守  
固關遘危疾妻張氏割臂以療絕飲食者七日祖壽生  
而張氏旋死遂終身不近婦人爲大帥部將以五百金  
遺其子於家却不受他日來省賜之卮酒曰却金一事  
善體吾心否則法不汝宥也其秉義執節如此  
趙率教陝西人萬曆中歷官延綏參將屢著戰功已劾  
罷遼事急詔廢將蓄家丁者赴軍前立功率教受知於  
經畧袁應泰擢副總兵典中軍事天啓元年遼陽破率



教潛逃罪當死倖免明年王化貞棄廣寧關外諸城盡  
空率教請於經畧王在晉願收復前屯衛城率家丁三  
十八人以往蒙古據其地不敢進抵中前所而止其年  
遊擊魯之甲以樞輔孫承宗令救難民六千口至前屯  
盡驅蒙古於郊外率教乃得入編次難民爲兵繕雉堞  
謹斥埃軍府由是粗立旣而承宗令裨將陳練以川湖  
土兵來助前屯守始固而率教所招流亡至五六萬擇  
其壯者從軍悉加訓練餘給牛種大興屯田身自督課  
至手足胼胝承宗出關閱視大喜以已所乘輿贈之蒙  
古虎墩兔素爲總督王象乾所撫其部下抽扣兒習善

率教捕斬四人招撫僉事萬有孚與率教有隙遂  
以故敗款事訪之象乾象乾告兵部尚書董漢儒將斬  
之賴承宗貽書漢儒得不死時承宗分關內外爲五部  
以馬世龍王世欽尤世祿領中左右部而令率教與副  
將孫諫領前後部部各萬五千人率教仍駐前屯四年  
九月承宗暴其功於朝擢署都督僉事加銜總兵五年  
冬承宗去高第來代諸將多所更置率教善事第第亦  
委信之六年二月蒙古以寧遠被圍乘間入犯平川三  
山堡率教禦之斬首百餘級奪馬二百匹追至高臺堡  
乃還捷聞帝大喜立擢都督同知實授總兵官代楊麒



鎮山海關尋論功再進右都督世廕本衛副千戶時滿  
守寧遠亦有盛名與率教深相得及寧遠被圍率教  
遣一都司四守備東援桂惡其稽緩拒不納以袁崇煥  
言乃令人既解圍率教欲分功桂不許且責其不親援  
兩人遂有隙中朝聞之下敕戒諭而桂又與崇煥不和  
乃召還桂令率教盡統關內外兵移鎮寧遠七年正月  
大清兵南征朝鮮率教督兵抵三岔河爲牽制卒無功  
三月崇煥議修築錦州大凌河申左所三城漸圖恢復  
率教移鎮錦州護工再加左都督五月

大清兵圍錦州率教與中官紀用副將左補朱梅等嬰

城固守發大礮頗多擊傷相持二十四日圍始解時桂  
亦著功寧遠因稱寧錦大捷魏忠賢等蒙重賞率教加  
太子少傅廕錦衣千戶世襲崇禎元年八月移鎮永平  
兼轄薊鎮八路踰月掛平遼將軍印再移至關門明年  
大清兵由大安口南下率教馳援三晝夜抵三屯營總  
兵朱國彥不令人遂策馬而西十一月四日戰於遵化  
中流矢陣亡一軍盡歿帝聞痛悼賜卹典立祠奉祀率  
教爲將廉勇待士有恩勤身奉公勞而不懈與滿桂並  
稱良將二人既歿益無能辦東事者國彥以崇禎二年  
四月爲薊鎮中協總兵官駐三屯營十一月六日



大清兵臨城副將朱來同等挈家潛遁國彥憤榜諸人姓名於通衢以所積俸銀五百餘衣服器具盡給部卒具冠帶西向稽首偕妻張氏投繯死

官惟賢萬曆末爲甘肅葦家營守備天啓二年以都司僉書署鎮番參將事歷宣府遊擊延綏西路參將仍移鎮番五年春河套松山諸部入犯惟賢偕參將丁孟科大敗之斬首二百四十餘級明年春班記刺麻台吉復糾松山銀定反成及矮木素三兒台吉以三千騎來犯惟賢專攻之獲首功二百有奇三兒台吉被創死進惟賢副總兵其冬銀定等以三兒之死挾憤圖報益糾河

套土巴台吉等分道入掠惟賢及鎮將徐永壽等亦分道拒之共獲首功百有六十七年春銀定竄兔矮木素班記刺麻台土賣火力赤等由黑水河入惟賢及西路副將陳洪範大破之斬首百八十餘級當是時西部頻寇邊惟賢屢挫其鋒其秋王之臣督師遼東乞惟賢赴關門明年崇禎改元惟賢至用爲山海北路副總兵二年冬京師有警惟賢入衛總理馬世龍令急援寶坻溇縣明年正月九日

大清兵自撫寧向山海翼日至鳳凰店離關三十里列三營惟賢與參將陳維翰等設兩營以待合戰互有殺



傷已

大清兵返撫寧世龍令惟賢率維翰及遊擊張奇化李居正王世選王成等往襲遵化至城西波羅灣城中兵出擊前鋒殊死戰

大清兵收入城後隊乘勢進攻城上矢石如雨尋復遣兵出戰惟賢陷陣中箭死士卒殺傷者三百餘人奇化亦戰歿

何可綱遼東人天啓中以守備典袁崇煥寧遠道中軍廉勇善撫士卒六年寧遠被圍佐崇煥捍禦有功進都司僉書明年再被兵復堅守遷參將署寧遠副將事崇

禎元年巡撫畢自肅令典中軍及崇煥再出鎮復以副將領中軍事靖十三營之變崇煥欲更置大將上言臣昔爲巡撫定議關外止設一總兵其時魏忠賢竊柄崔呈秀欲用其私黨增設三四人以致權勢相衡臂指不運乃止留寧遠及前鋒二人而臂指之不運猶故也臣以爲寧遠一路斷宜併歸前鋒總兵駐關內者掛平遼將軍印轄山石二路而以前屯隸之駐關外者掛征遼前鋒將軍印轄寧遠一衛而以錦州隸之薊遼總兵趙率教久習遼事宜與山海麻登雲相易掛平遼將軍印關外總兵舊有朱梅祖大壽梅已解任宜併歸大壽駐



錦州而以臣中軍何可綱專防寧遠可綱仁而有勇廉  
而能勤事至善謀其才不在臣下臣向所建豎實可綱  
力請加都督僉事仍典臣中軍則一鎮之費雖裁一鎮  
之用仍在臣妄謂五年奏凱者仗此三人之力用而不  
效請治臣罪帝悉從之可綱佐崇煥更定軍制歲省餉  
百二十萬有奇以春秋二防功進職右都督二年冬京  
師被兵與大壽從崇煥入衛數有功崇煥下吏乃隨大  
壽東潰復與歸朝明年正月永平灤州失守可綱戰古  
冶鄉及雙望頗有斬獲四月樞輔孫承宗令可綱督諸  
將營雙望諸山以綴永平之師令大壽諸軍直趨灤州

灤州既復

大清兵棄永平去可綱遂入其城論功加太子太保左  
都督已而錦州被圍可綱督諸將赴救立功郵馬山復  
進秩四年築城大凌河命可綱偕大壽護版築八月甫  
竣工  
大清以十萬衆來攻可綱等堅守不下久之糧盡援絕  
大壽及諸將皆欲降獨可綱不從令二人掖出城外殺  
之可綱顏色不變亦不發一言含笑而死  
黃龍遼東人初以小校從復錦州積功至參將崇禎三  
年從大軍復灤州功第一遷副總兵尋論功進秩三等



爲都督僉事世廕副千戶登萊巡撫孫元化以劉興治亂東江請龍往鎮兵部尚書梁廷棟亦薦龍爲總兵官與元化恢復四衛從之先是毛文龍死袁崇煥分其兵二萬八千爲四協命副將陳繼盛參將劉興治毛承祚徐敷奏主之後改爲兩協繼盛領東協興治攝西協語詳崇煥傳興治兇狡好亂與繼盛不相能其兄參將興祚陣亡繼盛誤聽謀報謂未死興治憤擇日爲興祚治喪諸將咸弔繼盛至伏兵執之竝執理餉經歷楊應鶴等十一人袖出一書宣於衆謔言此繼盛誣興祚詐死及以謀叛誣陷已者遂殺繼盛及應鶴等又僞爲島中

商民奏一通請優卹興祚而令興治鎮東江舉朝大駭以海外未遑詰也興治與諸弟兄放舟長山島大肆殺掠島去登州四十里時登萊總兵官張可大赴援永平帝周廷棟言趣可大還登州授副將周文郁大將印令撫定興治會永平已復興治稍戢返東江龍蒞皮島受事興治猶桀驁如故四年三月復作亂杖其弟興基殺參將沈世魁家衆世魁率其黨夜襲殺興治亂乃定遊擊耿仲明之黨李梅者通洋事覺龍繫之獄仲明弟都司付裕在龍軍謀作亂十月率部卒假索餉各圍龍署擁至演武場折股去耳鼻將殺之諸將爲救免未幾龍



捕斬仲裕疏請正仲明罪會元化劫龍尅餉致兵譁帝命充爲事官而覈仲明主使狀仲明遂偕孔有德反以五年正月陷登州招島中諸將旅順副將陳有時廣鹿島副將毛承祿皆往從之龍急遣尚可喜金聲桓等撫定諸島而躬巡其地慰商民誅叛黨縱火焚其舟賊黨高成友者據旅順斷關寧天津援師龍令遊擊李維鸞偕可喜等擊走之卽移駐其地援始通其冬有德等欲棄登州走入海龍遣副將龔正祥率舟師四千邀之廟島颶風破舟正祥陷賊中後居登州謀爲內應事露被殺初龍駐旅順大治兵賊拘龍母妻及子以脇之龍不

傾六年二月有德仲明屢爲巡撫朱大典所敗航海遁去龍度有德等必遁遁必經旅順邀擊之有德幾獲而逸斬賊魁李九成子應元生禽毛承祿蘇有功陳光福及其黨高志祥等十六人獲首級一千有奇奪還婦女無算獻俘於朝帝大喜祿承祿等傳首九邊復龍官承祿文龍族家子也有德等大憤欲報龍會賊舟泊鴨綠江龍盡發水師勦之七月有德等偵知旅順空虛遂引大清兵來襲龍數戰皆敗火藥矢石俱盡語部將譚應華曰敵衆我寡今夕城必破若速持吾印送登州不能赴卽投諸海可也應華出龍率惟鸞等力戰圍急知不



能脫自到死惟鸞及諸將項祚臨奕化龍張大祿尚可  
義俱死之事聞贈龍左都督賜祭葬于世廕建祠曰顯  
忠惟鸞等附祀以副總兵沈世魁代龍爲總兵官世魁  
本市僧其女有殊色爲毛文龍小妻世魁倚勢橫行島  
中至是爲大帥七年二月廣鹿島副將尚可喜降於我  
大清島中勢益孤十年朝鮮告急世魁移師皮島爲聲  
援有德等來襲世魁戰敗率所部走石城副將金日觀  
陣歿登萊總兵陳洪範來援不戰而走世魁亦陣亡士  
卒死傷者萬餘從子副將志科集潰卒至長城島欲得  
世魁敕印監軍副使黃孫茂不予志科怒殺之並殺理

領通判孫啓副將白登庸遂率所部降

世魁

大清諸島雖有殘卒不能成軍朝廷亦不置大帥以登  
萊總兵遙領之而已明年夏楊嗣昌決策盡徙其兵民  
寧錦而諸島一空  
金日觀不知何許人天啓五年以將才授守備効力關  
門擢鎮標中軍遊擊加參將行薊鎮東路遊擊事專領  
南兵崇禎初加副總兵守馬蘭峪三年正月  
大清兵破京東列城兵部侍郎劉之綸遣部將吳應龍  
等結營毛山規取羅文谷關師敗日觀遣二將馳援亦  
敗歿



大清兵乘勝據府君玉皇二山進攻馬蘭城甚急日觀  
堅守親然大礮礮炸焚頭目手足意氣不衰乞援於總  
理馬世龍令參將王世選等赴救兵乃退尋復以二千  
餘騎來攻日觀借世選等死守不下朝廷獎其功驟加  
都督同知四月與副將謝尚政曹文詔等攻復大安城  
遂借諸軍復遵化錄功進左都督時總兵鄧紀轄馬蘭  
松棚二路日觀應受節制以圮街都督同知不屑爲之  
下總督曹文衡劾日觀器小易盈恃功驕縱帝特戒飭  
而已久之移萊州副總兵十年春  
大清兵攻朝鮮命從登萊總兵陳洪範往救駐師皮島

大清遣孔有德耿仲明尚可喜等先攻鐵山四月分兵  
攻皮島水陸夾攻副將白登庸先遁洪範亦避走石城  
登庸尋帥所部降日觀借諸將楚繼功等相持七晝夜  
力不支陣歿島城隨破贈特進光祿大夫太子太師世  
廕錦衣副千戶建祠繼功等贈卹有差  
贊曰古人有言彼且爲我死故我得與之俱生故死封  
疆之臣君子重之觀遼左諸帥委身許國見危不避可  
謂得死所者與於時優卹之典非不甚渥然而無救於  
危亡者廟算不定僨事者不誅文墨議論之徒從而撓  
之徒激勸忠義無益也







都督僉事爲寧遠團練總兵官再論功畧都督同知騰  
錦衣衛千戶是年十月  
大清兵復攻寧遠國鳳憤將士惟怯率親丁數十人出  
據北山岡鏖戰移時矢盡力竭與二子俱死帝聞痛悼  
贈特進榮祿大夫左都督賜祭葬有司建祠增世職三  
級總督洪承疇上言國鳳素懷忠勇前守松山兵不滿  
三千乃能力抗強敵卒保孤城非其才力優也以事權  
專號令一而人心肅也迨擢任大將兵近萬人反致隕  
命非其才力短也由營伍紛紜號令難施而人心不一  
也乞自今設連營節制之法凡遇警守城及統兵出戰

惟總兵官令是聽庶軍心齊肅戰守有資所係於封疆  
甚大帝卽允行之及國鳳父子極歸帝念其忠命所過  
有司給以卹車且加工祭其妻張氏援劉綎例乞加宮  
保部議格不行而請於世職增級外再廕本衛試百戶  
世襲以勸忠臣帝可之當松山被圍巡撫方一藻議遣  
兵救援諸將莫敢應獨副將楊振請行至呂洪山遇伏  
一軍盡覆振被執令往松山說降未至里許踞地南向  
坐語從官李祿曰爲我告城中人堅守援軍卽日至矣  
祿詣城下致振語城中守益堅振祿皆被殺事聞命優  
恤振義州衛人世爲本衛指揮使天啓二年河東失守



歸路梗其母自縊振隨父及弟夜行晝伏渡鴨綠江入  
皮島毛文龍知其父子才竝署軍職文龍死振歸袁崇  
煥爲寧遠千總崇禎二年從入衛救開平有功進都司  
僉書郵馬山之戰以遊擊進參將久之擢副總兵監視  
中官高起潛招致之不往中以他事落職用一藻薦復  
官及是死難振從父國柱崇禎九年爲宣府總兵官十  
一年冬入衛畿輔從總督盧象昇戰賈莊象昇敗歿國  
柱當坐罪大學士劉宇亮侍郎孫傳庭皆言其身入重  
圍非臨敵退却者比乃充爲事官戴罪圖功十四年祖  
大壽被困錦州總督洪承疇率八大將往救國柱先至

松山陷伏中

大清兵四面呼降國柱太息語其下曰此吾兒子昔年  
殉難處也吾獨爲降將軍乎突圍中矢墮馬卒事聞贈  
卹如制國柱二子俱歿妻何氏以所遺甲冑弓矢及戰  
馬五十三匹獻諸朝帝深嘉歎命授一品夫人有司月  
給米石餼之終身

曹變蛟文詔從子也幼從文詔積軍功至遊擊崇禎四  
年從復河曲明年連破賊紅軍友等於張麻村隴安水  
落城唐毛山又破劉道江等於銅川橋勇冠諸軍以御  
史吳甞薦進參將文詔移山西變蛟從戰輒勝及文詔



改鎮大同山西巡撫許鼎臣言晉販紫金梁雖死老回  
回過天星大天王蝎子塊闖場天諸渠未滅變蛟驍勇  
絕人麾下健兒千百才乃文詔亞乞留之晉中從之七  
年羣賊入湖廣命變蛟南征文詔困於大同又命北援  
七月遇

大清兵廣武有戰功其冬文詔失事論戍變蛟亦以疾  
歸明年文詔起討陝西賊變蛟以故官從大捷金嶺川  
鏖真寧之秋頭鎮皆爲軍鋒文詔既戰歿變蛟收潰卒  
復成一軍總督洪承疇薦爲副總兵置麾下與高傑破  
賊關山鎮逐北三十餘里又與副將尤翟文遊擊孫守

西遊擊高迎祥與戰鳳翔官亭斬首七百餘級又與  
總兵左光先敗迎祥乾州迎祥中箭走斬首三百五十  
餘級已而迎祥自華陰南原絕大嶺夜出朱陽關光先  
戰不利賴變蛟陷陣乃獲全九年破關將澄城偕光先  
等追至靖虜衛轉戰定會軍抵靜寧固寧賊屢挫其  
秋追混天星等敗之南城賊西走平涼鞏昌復擊破之  
十年二月巡撫孫傳庭部卒許忠叛勾賊混十萬謀犯  
西安變蛟方西追過天星聞亂急還賊遂遁傳庭已誅  
迎祥其黨闖將混天星過天星踞洮岷階文深谷間承  
疇遣變蛟光先及祖大弼孫顯祖合擊四月望入山遇



賊郭家壩大雨諸將力戰賊死傷無算食盡引還九月  
階州陷與光先竝停俸俄擢都督僉事爲臨洮總兵官  
當是時承疇傳庭其矢滅賊傳庭戰於東承疇戰於西  
東賊幾盡賊在西者復由階成出西和禮縣光先顯祖  
皆無功獨變蛟降小紅狼餘賊竄走徽州兩當成鳳間  
不敢大逞十日賊羈蜀中虛陷寧羌州分三道連陷三  
十餘州縣承疇率變蛟等由沔縣歷寧羌過七盤朝天  
二關山高道狹士馬饑疲歲暮抵廣元賊已走還秦變  
蛟等回軍邀擊斬首五百餘級時兵部尚書楊嗣昌勅  
四正六隅之說限三月平賊十二年四月以滅賊踰期

難本降罰變蛟光先竝鑄五官戴罪辦賊賊之再入秦  
也其渠魁號大隊者與大天王混天王爭管王相副建  
營東犯混天星過天星二部仍伏階文獨闖將李自成  
以三月自洮州出番地承疇令變蛟偕賀人龍追之連  
戰斬首六千七百有奇番地乏食賊多死亡變蛟轉戰  
千里身不解甲者二十七晝夜餘賊潰入塞大弼駐洮  
州扼戰不力乃走入岷州及西和禮縣山中變蛟還勦  
賊伏匿不敢出惟六隊勢猶張六月光先自固原進兵  
賊已奔隴州清水光先追至秦州六隊及爭管王復走  
成縣階州爲變蛟所扼其別部號三隊及仁義王混天



王降於光先而自成六隊及其黨祁總管避秦兵復謀  
犯蜀副將馬科賀人龍拒之將還走階文及西鄉憚變  
蛟乃走漢中又爲光先所扼六隊祁總管皆降惟自成  
東遁承疇令變蛟窮追而設三覆於潼關之南原變蛟  
追及大呼斫賊伏盡起賊屍相枕藉村民用大棒擊逃  
者自成妻女俱失從七騎遁去餘皆降是時曹兵最強  
各鎮依之以爲固錄關中平賊功進變蛟左都督十一  
月京師戒嚴召承疇入衛變蛟及光先從之明年二月  
抵近畿帝遣使迎勞將士各有賜未幾戰渾河無功再  
戰太平砦北小有斬獲及解嚴留屯遵化麾下皆秦卒

思歸多逃亡者追斬之乃定時張獻忠羅汝才旣降復  
叛陝西再用兵總督鄭崇儉乞令變蛟兵西還帝不許  
尋用爲東協總兵官十三年五月錦州告急從總督承  
疇出關駐寧遠七月與援勦總兵左光先山海總兵馬  
科寧遠總兵吳三桂遼東總兵劉肇基遇  
大清兵於黃土臺及松山杏山互有殺傷  
大清兵退屯義州承疇議遣變蛟光先科之兵入關養  
銳留三桂肇基於松杏間佯示進兵狀又請解肇基任  
代以王廷臣遣光先西歸代以白廣恩部議咸從之而  
請調旁近邊軍合關內外見卒十五萬人備戰守用承



疇言師行糧從必芻糧足支一歲然後可議益兵帝然  
之救所司速措給徵宣府總兵楊國柱大同總兵王樸  
密雲總兵唐通各揀精兵赴援以十四年三月借變蛟  
科廣恩先後出關合三桂廷臣凡八大將兵十三萬馬  
四萬竝駐寧遠承疇主持重而朝議以兵多餉艱職方  
郎張若麒趣戰承疇念祖大壽被圍久乃議急救錦州  
七月二十八日諸軍次松山營西北岡數戰圍不解八  
月國柱戰歿以山西總兵李輔明代之承疇命變蛟營  
松山之北乳峰山之西兩山間列七營環以長壕俄聞  
我

太宗文皇帝親臨督陣諸將大懼及出戰連敗餉道又絕  
樸先夜遁通科三桂廣恩輔明相繼走自杏山迤南沿  
海東至塔山爲  
大清兵邀擊溺海死者無算變蛟廷臣聞敗馳至松山  
與承疇固守三桂樸奔據杏山越數日欲走還寧遠至  
高橋遇伏大敗僅以身免先後喪士卒凡五萬三千七  
百餘人自是錦州圍益急而松山亦被圍應援俱絕矣  
九月承疇變蛟等盡出城中馬步兵欲突圍出敗還守  
半年至明年二月副將夏成德爲內應松山遂破承疇  
變蛟廷臣及巡撫邱民仰故總兵祖大樂兵備道張斗



姚恭王之楨副將江翥饒勲朱文德參將以下百餘人  
皆被執見殺獨承疇與大樂獲免文德義州衛人後家  
錦州崇禎時積功至松山副將忤監視中官高起潛爲  
所中斥罷十一年起故官及城被圍領前鋒拒守甚力  
城破竟死三月大壽遂以錦州降杏山塔山連失京師  
大震詔賜諸臣祭葬有司建祠變較妻高氏以贈廕請  
乃贈榮祿大夫太子少保世廕錦衣指揮僉事法司會  
鞫王樸罪御史郝晉言六鎮罪同皆宜死三桂實遼左  
主將不戰而逃奈何反加提督兵部尚書陳新甲覆議  
請獨斬樸勒科軍令狀再失機卽斬決三桂失地應斬

念守寧遠功與輔明廣恩通皆貶秩充爲事官輔明遠  
東人累官副總兵崇禎八年從祖寬擊賊連蹙之嵩經  
汝州確山明年追破賊於滁州敘功加都督僉事十二  
年擢山西總兵官被劾罷明年從承疇出關使代國柱  
竟敗十六年爲援剿總兵是冬

大清兵薄寧遠輔明馳援軍敗猶力戰歿於陣事聞贈  
特進榮祿大夫左都督世廕錦衣副千戶賜祭葬列壇  
前屯祀之樸榆林衛人父威官左都督九佩將印爲提  
鎮者五十年兄世欽皇居殉難見尤世威傳中樸由父  
廕屢遷京營副將崇禎六年賊躡畿南命樸與倪寵爲



總兵官將京軍六千監以中官楊應朝盧九德屢有新  
獲功進右都督明年代曹文詔鎮大同進左都督九年  
秋都城被兵詔樸入衛賚蟒衣彩幣竟無功十一年加  
太子太保是冬從總督盧象昇入衛方戰樂城東鹿間  
或言大同有警卽引兵歸及是救錦州以首逃下詔獄  
十五年五月伏誅科起偏裨至大帥戰功亞變蛟與三  
桂同守寧遠有功十六年春督兵入衛賜宴武英殿命  
從大學士吳姓南征不果行明年三月從李建泰西征  
李自成兵至科遂降封懷仁伯廣恩初從混天猴爲盜  
旣降屢立戰功松山敗還代馬科鎮山海關是年十一

月京師戒嚴廣恩入衛賚銀幣羊酒俄戰龍王口稔有  
斬獲以捷聞帝始惡廣恩觀望降旨譙責而冀其後效  
特命敘功明年四月合八鎮兵戰螺山悉潰敗總督趙  
光抃請帝召之入用爲武經畧廣恩以帝頻戮大將已  
又多過懼不敢至假索餉名頓真定大學士吳姓將南  
征密請帝嚴旨速治而已力救率之勦寇廣恩感甚無  
何帝遣中官齎二萬金犒其軍且諭以溫旨廣恩遂騎  
不爲銜用大掠臨洛關徑歸陝西帝不得已命隸督師  
孫傳庭辦賊十月郝縣師覆加廣恩盪寇將軍俾緣道  
收潰卒以保潼關未幾潼關亦破廣恩西奔固原賊將



日身卷三十三 列傳 九  
追躡及之卽開門降自成大喜握手共飲封桃源伯通  
口辯無勇畧旣敗歸仍鎮密雲其年冬奉詔入衛命守  
禦三河平谷

大清兵下山東通尾之而南抵青州迄不敢一戰明年  
復尾而北戰螺山敗績已命從性南征性未行而斥乃  
令通轄薊鎮西協五月沃密雲總兵官命兼轄中協四  
路尋用孔希貴於西協而命通專轄中協十月關外有  
警命率師赴援以銀牌二百爲賞功用事定復移鎮西  
協帝顧通厚有蟒衣玉帶之賜召見稱卿而不名錫之  
宴獎勞備至明年賊逼宣府命移守居庸封定西伯無

何賊犯關卽偕中官杜之秩迎降京師遂陷光先梟將  
也與賊角陝西功最多自遼左遣還廢不用後聞廣恩  
從賊亦詣賊降又有陳永福者守開封射李自成中目  
及自成陷山西令廣恩諭之降永福懼誅意猶豫自成  
折箭以示信乃降封爲文水伯後自成敗還山西永福  
爲守太原殺晉府宗室殆盡

劉肇基字鼎維遼東人嗣世職指揮僉事遷都司僉書  
隸山海總兵官尤世威麾下崇禎七年從世威援宣府  
又從勦中原賊進遊擊戍維南蘭草川明年遇賊戰敗  
傷臂未幾世威罷肇基及遊擊羅岱分將其兵與祖寬



大破賊汝州斬首千六百有奇後從寬數有功而其部下皆邊軍久戍思歸與寬軍謀而走總理盧象昇乃遣之入秦其秋畿輔有警始還山海竟坐前罪解職令從征自效俄以固守永平功復職屢遷遼東副總兵十二年冬薊遼總督洪承疇請用爲署總兵官分練寧遠諸營卒兵部尚書傅宗龍稍持之帝怒下宗龍獄擢肇基都督僉事任之明年三月錦州有警承疇命吳三桂偕肇基赴松山爲聲援三桂因松杏間肇基救出之喪士卒千人七月與曹變蛟等戰黃土臺及松山杏山九月復戰杏山肇基軍稍却承疇甄別諸將解肇基職代以

王廷臣十七年春加都督同知提督南京大教場及福王立史可法督師淮揚肇基請從征自效屢加左都督太子太保可法議分布諸將奏薦李成棟賀大成王之綱李本身胡茂楨爲總兵官成棟鎮徐州大成揚州之綱開封本身茂楨隸高傑麾下爲前鋒而令肇基駐高家集李棲鳳駐睢寧以防河棲鳳本甘肅總兵以地失留淮揚間也閣標前鋒則用張天祿駐瓜洲十一月肇基棲鳳以可法命謀取宿遷初八日渡河復其城越數日

大清兵圍邳州軍城北肇基軍城南相持半月



大清兵引去

順治二年三月

大清兵抵揚州可法邀諸將赴援獨肇基自白洋河趨  
赴過高郵不見妻子既入城請乘

大清兵未集背城一戰可法持重肇基乃分守北門發  
礮傷圍者已而城破率所部四百人巷戰格殺數百人  
後騎來益衆力不支一軍皆沒副將乙邦才馬應魁莊  
子固等皆同死乙邦才青州人崇禎中以隊長擊賊於  
河南江北間大將黃得功與賊戰霍山單騎逐賊陷淖  
中賊圍而射之馬斃得功徒步鬪天將暮僅餘二矢邦

才大呼衝賊走得功乃得出邦才授以已馬分矢與之  
且走且射殪追騎十餘人始得及其軍得功自是知邦  
才時有張衡者亦以驍敢名賊圍六安急總督馬士英  
救之甫至斥其左右副將而號於軍中曰孰爲乙邦才  
張衡者兩人入謁卽牒補副將以其兵授之曰爲我入  
六安取知州狀來報兩人出卽簡精騎二百夜衝賊陣  
而入遶城大呼曰大軍至矣固守勿懈城中人喜守益  
堅兩人促知州署狀復奪圍出不損一騎時穎壽六安  
霍山諸州縣數被寇邦才大小十餘戰咸有功及可法  
鎮揚州攜之行至是戰敗自刎死馬應魁字守卿貴池



人初爲小將率家丁五十人巡村落間猝遇賊衆懼欲  
奔應魁大聲曰勿怖死死命也連發二矢殪二賊賊卽  
退可法因拔爲副總兵俾領旗鼓每戰披白甲大書盡  
忠報國四字於背至是巷戰死莊子固字憲伯遼東人  
年十三殺人亡命後從軍有功積官至參將嘗從山西  
總兵許定國救開封軍半道譟歸定國獲罪子固輯餘  
衆得免議後可法出鎮用爲副總兵俾興屯於徐州歸  
德間子固募壯士七百人以赤心報國爲號聞揚州被  
圍率衆馳救三日而至城將破欲擁可法出城遇  
大清兵格鬪死他若副將樓挺江雲龍李豫參將陶國  
祚許謹馮國用陳光玉李隆徐純仁遊擊李大忠孫開  
忠都司姚懷龍解學會等十餘人皆以巷戰死  
贊曰金國鳳之善守曹變蛟之力戰均無媿良將材然  
而運移事易難於建功而易於挫敗遂至謀勇兼絀以  
身殉之蓋天命有歸莫之爲而爲者矣



...天命奇禍莫之為而為者矣...  
...日金國鳳之善守曹變效之...  
...文卷二百七十二...

明史卷二百七十二 列傳第一百六十一

總裁官糧事務 經筵官保兼李太保保殿學士兼管都察院事務加級張廷玉等

救修 祖曾寬 左良玉 鄧現 賈人龍 高傑 劉澤清

左良玉字崑山臨清人官遼東車右營都司崇禎元年  
寧遠兵變巡撫畢自肅自經死良玉坐削職回衛已復  
官總理馬世龍令從遊擊曹文詔援玉田豐潤連戰洪  
橋大塹山直抵遵化論恢復四城功與文詔等俱進  
隸昌平督治侍郎侯恂麾下大凌河圍急詔昌平軍



援總兵尤世威護陵不得行薦良玉可代率兵往已恂  
薦爲副將戰香山杏山下錄功第一良玉少孤育於叔  
父其貴也不知其母姓長身頰面驍勇善左右射目不  
知書多智謀撫士卒得其歡心以故戰輒有功時陝西  
賊入河南圖懷慶廷議令良玉將昌平兵往勦大指專  
辦河南會賊寇修武清化者竄入平陽因檄良玉入山  
西禦之頗有斬獲河南巡撫樊尚璟以良玉駐澤州扼  
豫晉咽喉可四面爲援兵詔從之時曹文詔將陝西兵  
帝令良玉受尚璟節制與文詔同心討賊有急則秦兵  
東豫兵西良玉兵從中橫擊六年正月賊犯陽州陷臨

城良玉敗之於涉縣之西陂二月良玉兵與賊戰武安  
大敗尚璟罷以太常少卿元默代之三月賊再入河內  
良玉自輝縣逐之賊奔修武殺遊擊越效忠追參將陶  
希謙希謙墜馬死良玉擊之萬善至柳善口大敗之  
禽賊首數人賊遂西奔河南額兵僅七千數被賊折亡  
殆盡良玉將昌平兵二千餘數戰雖有功勢孤甚總兵  
鄧玘方立功萊州乃命將川兵益以石砭土司馬鳳儀  
共馳赴良玉與共角賊已而鳳儀以孤軍戰沒於侯家  
莊當是時賊勢已大熾縱橫三晉畿輔河北間諸將曹  
文詔李卑艾萬年湯九州鄧玘良玉等先後與賊戰勝



負畧相當良玉玘辦河南屢破之於官村於沁河於清  
化於萬善良玉又扼之武安八德斬獲尤多會帝命倪  
寵王樸爲總兵將京營兵六千赴河南以中官楊應朝  
盧九德監其軍而別遣中官監良玉等軍職方郎中李  
繼貞曰良玉李卑身經百戰位反在寵樸下恐聞而解  
體乃令良玉李卑署都督僉事爲援勦總兵官與寵樸體  
相敵京營兵至共擊賊數有功良玉敗賊濟源河內又  
敗之永寧青山嶺銀洞溝又自葉縣追至小武當山皆  
斬賊魁甚衆然諸將以中官監軍意弗善也其冬賊西  
奔者復折而東良玉九州扼其前京營兵尾其後賊大  
困官軍連破之柳泉猛虎村賊張妙手賀雙全等三千  
六家詭詞乞撫於分巡布政司常道立因監軍應朝以  
請諸將俟朝命不出戰會天寒河冰合賊遂從澠池徑  
渡巡撫默率良玉九州卑玘兵待之境上賊乃竄盧氏  
山中由此自鄆襄入川中折而掠秦隴復出沒川中湖  
北以犯河南中原益大殘破而三晉畿輔獨不受賊禍  
者十年賊卽渡河去良玉與諸將分地守陳奇瑜盧象  
昇方角賊秦楚七年春夏間中州幸無事旣而奇瑜失  
李自成於車箱廷議合晉豫楚蜀兵四面勦之賊乃分  
軍三一向慶陽一趨鄆陽而一出關趨河南趨河南



又分爲三郡邑所在告急良玉扼新安澠池他將陳治  
邦駐汝州陳永福扼南陽皆坐甲自保而已不能大創  
賊也賊每營數萬兵番進皆因糧宿飽我兵寡備多饋  
餉不繼賊介馬馳一日夜數百里我步兵多騎少行數  
十里輒疲之以故多畏賊而良玉在懷慶時與督撫議  
不合因是生心緩追養寇多收降者以自重督撫檄調  
不時應命稍稍露跋扈端矣十二月遇賊於磁山大戰  
數十追奔百餘里八年正月河南賊破潁州毀鳳陽皇  
陵其陷鹿邑柘城寧陵通車由良玉在許州不能救四  
月督師洪承疇在汝州令諸將分出遮賊尤世威守維

南陳永福控盧氏永寧鄧玘尤翟文張應昌許成名湯  
湖廣以吳村瓦屋乃內鄉浙川要地令良玉與湯九州  
以五千人扼之未幾鄧玘以兵譁死而曹文詔討陝賊  
敗沒於真寧賊益張遂超盧氏奔永寧巡撫默被逮未  
去檄良玉自內鄉與陳治邦馬良文等援盧氏八月敗  
賊於鄆陵九月躡賊於郝之神垆山賊連營數十里番  
休更戰以疲我兵良玉收其軍而止賊再攻密良玉自  
郝援之乃去十月良玉抵靈寶合遼東總兵祖寬兵剪  
賊於澗口焦村焦村朱陽關地也十一月李自成出朱  
陽關張獻忠久據靈寶闖王高迎祥亦與合良玉寬禦



之靈寶不能支陝州陷賊東下攻洛陽良玉寬從巡撫  
陳必謙救洛陽賊乃去迎祥自成走偃師鞏獻忠走嵩  
汝良玉出雒追迎祥自成寬分擊獻忠救汝會總理盧  
象昇至自湖廣與寬大敗賊汝西令裨將破賊於宜陽  
黃澗口九年二月賊敗於登封郟城鎮走石陽關與伊  
嵩之賊合故總兵九州由嵩縣深入與良玉夾勦良玉  
中道道歸九州乘勝窮追四十里無援敗殺良玉反以  
捷聞五月象昇遣祖寬李重鎮隨陝西總督洪承疇西  
行良玉軍最強又率中州人故獨久留之而以其驕亢  
難用用孔道興代其偏將趙桂駐靈寶防維西良玉與

延徽駐宣永防維東七月良玉兵抵開封由登封之唐  
莊探入擊賊自辰鏖至申賊不支西走陳永福方敗賊  
於唐河賊至田家營良玉渡河擊之斬獲頗衆九月巡  
撫楊繩武劾良玉避賊責令戴罪自贖十年正月賊老  
獍猶合曹操闖塌天諸部沿流東下安慶告警詔良玉  
從中州救之良玉道勦殺南陽土寇楊四侯馭民郭三  
海急抵六安與賊遇部將岱道興乘勝連戰大破賊賊  
走霍潛山會馬燝劉良佐亦屢敗賊於桐城廬州六安  
賊在滁和者亦西遁江北警少息應天巡撫張國維三  
檄良玉入山搜勦不應放兵掠婦女屯舒城月餘河南



監軍太監力促之始北去賊已飽掠入山矣已漸川陷  
良玉擁兵不救以六安破賊功詔落職戴罪尋復之賊  
東下襲六合攻天長分掠瓜洲儀真破盱眙良玉堅不  
肯校令中州士大夫合疏留已帝知出良玉意不能奪  
也十月總理熊文燦至安慶部檄以良玉軍隸焉良玉  
輕文燦不爲用十一年正月良玉與總兵陳洪範大破  
賊於郟西張獻忠假官旗號襲南陽屯於南關良玉適  
至疑而急召之獻忠逸去追及發兩矢中其肩復揮刀  
擊之面流血其部下救以免遂逃之穀城未幾請降良  
玉知其僞力請擊之文燦不許九月文燦勦郟襄諸賊

良玉與洪範及副將龍在田擊破之雙溝營斬首一二  
餘級十二月河南巡撫常道立調良玉於陝州賊乘虛  
氏虛遁入內浙是月許州兵變良玉家在許燬焉十二  
年二月良玉率降將劉國能入援京師詔還計河南賊  
兵逼潁頭吳橋大掠太監盧九德疏聞詔令戴罪已而  
破賊馬進忠於鎮守府進忠降又與國能再破賊李萬  
慶於義家林七里高慶亦降七月獻忠叛去良玉與  
羅勳理之使岱爲前鋒已隨其後逾房縣八十里至羅  
嶺山軍乏食伏起岱馬掛於藤抽刀斷之蹶而復進棄  
馬登山賊圍急矢盡被獲良玉大敗奔還軍符印信盡



失棄軍資千萬餘士卒死者萬人事聞以輕進貶三秩  
十三年春督師楊嗣昌薦良玉雖敗有大將才兵亦可  
用遂拜平賊將軍當是時賊分爲三西則張獻忠踞楚  
蜀郊東則革裏眼左金王等四營豕突隨應麻黃南則  
曹操過天星等十營伏漳房興遠間閏正月良玉合諸  
軍擊賊於柵坪關獻忠敗走良玉乃請從漢陽西鄉入  
蜀追之嗣昌謀以陝西總督鄭崇儉率賀人龍李國安  
從西鄉入蜀而令良玉駐兵興平別遣偏將追勦良玉  
不從嗣昌檄良玉曰賊勢似不能入川仍當走死秦界  
耳將軍從漢陽西鄉入川萬一賊從舊路疾趨平利仍

入竹房將何以禦不則走寧昌入歸巫與曹操合我以  
去將尾追促賊反楚非算也良玉報曰蜀地肥衍賊渡  
險任其奔軼後難制且賊入川則有糧可因回師則無  
地可掠其不復窺楚境明矣夫兵合則強分則弱今已  
留劉國能李萬慶守郾若再分三千人入蜀卽駐興平  
兵力已薄賊來能遏之耶今當出其不意疾攻之一大  
創自然瓦解縱折回房竹間人跡斷絕彼從何得食况  
鄖兵扼之於前秦撫在紫興扼之於右勢必不得逞若  
寧昌歸巫險且遠曹操獻忠不相下倘窮而歸曹必內  
相吞其亡立見良玉已於二月朔涉蜀界之漁溪渡矣



嗣昌度力不能制而其計良是遂從之時獻忠營太平縣大竹河良玉駐漁溪渡未幾總督崇儉引其兵來會賊移軍九滾坪見瑪瑙山峻險將據之良玉始抵山下賊已踞山顛乘高鼓譟良玉下馬周覽者久之曰吾知所以破賊矣分所進道爲三已當其二秦兵當其一令曰聞鼓聲而上兩軍夾擊賊陣堅不可動鏖戰久之賊大潰墜崖澗者無算追奔四十里良玉兵斬掃地王曹威白馬鄧天王等渠魁十六人獻忠妻妾亦被禽遁入興山歸州之山中尋自鹽井竄興歸界上是役也良玉功第一事聞加太子少保四月良玉進屯興安平判諸

山連營百里諸軍憚山險圍而不攻久之獻忠自興房走白羊山而西與羅汝才合七月良玉乘勝擊過天星降之過天星者名惠登相既降遂始終爲良玉部將初良玉受平賊將軍印褒驕不肯受督師約束而賀人龍屢破賊有功嗣昌私許以人龍代良玉及良玉奏瑪瑙山捷嗣昌語人龍須後命人龍大恨具以前語告良玉良玉亦內恨當獻忠之敗走也追且及遣其黨馬元利操重寶啗良玉曰獻忠在故公見重公所部多殺掠而閣部猜且專無獻忠卽公滅不久矣良玉心動縱之去監軍萬元吉知良玉跋扈不可使勸嗣昌令前軍躡賊



後軍繼之而身從間道出梓潼扼歸以俟濟師嗣昌不用賊既入蜀之巴州人龍兵譟而西歸召良玉兵合擊九墩皆不至十四年正月諸軍追賊開縣之黃陵城參將劉士杰深入所當披靡獻忠登高望見無秦人旗幟而良玉兵前部無鬪志獨士杰孤軍迺密選壯士潛行菁谷中乘高大呼馳下良玉兵先潰總兵猛如虎潰圍出嗣昌方悔不用元吉言而獻忠已席卷出川西絕新開驛置楚蜀消息中斷遂以計給入襄陽城襄王被執嗣昌不食卒賊瀕死復縱迄以亡國者以良玉素稱塞不用命故也二月詔良玉削職戴罪平賊自贖五月獻

忠陷南陽卽攻泌陽破之良玉至南陽賊遁去良玉不戢士泌人脫於賊者遇官軍無噍類旣而獻忠陷郟西掠地至信陽屢勝而驕良玉乃從南陽進兵復大破之降其衆數萬獻忠中股負重傷夜遁而是時李自成方殘襄城圍良玉於偃城幾陷會陝西總督汪喬年出關自成乃輟圍與喬年戰襄陽城外喬年軍盡覆良玉不能救帝旣斬賀人龍以肅軍政專倚良玉辨賊十五年三月自成復圍開封乃釋故尚書初薦良王者侯恂於獄起爲督師發帑金十五萬犒良玉營將士激勸之良玉及虎大威楊德政會師朱仙鎮賊營西官軍營北良



玉見賊勢盛一夕拔營遁衆軍望見皆潰自成戒士卒待良玉兵過從後擊之官軍幸追者緩疾馳八十里賊已於其前穿塹深廣各二尋環繞百里自成親率衆遮於後良玉兵大亂下馬渡溝僮仆溪谷中趾其顛而過賊從而蹂之軍大敗棄馬騾萬匹器械無算良玉走襄陽帝聞良玉敗詔恂拒河圖賊而令良玉以兵來會良玉畏自成遷延不至九月開封以河決而云帝怒恂罷其官不能罪良玉也開封既亡自成無所得遽引兵西謀拔襄陽爲根本時良玉壁樊城大造戰艦驅襄陽一郡人以資軍諸降賊附之有衆三十萬然親軍愛將大半死而降人不奉約束良玉亦漸衰多病不復能與自成角矣自成乘勝攻良玉良玉退兵南岸結水寨相持以萬人扼淺洲賊兵十萬爭渡不能過良玉乃宵遁引其舟師左步右騎而下至武昌從楚王乞二十萬人餉曰我爲王保境王不應良玉縱兵大掠火光照江中宗室士民奔竄山谷多爲土寇所害驛傳道王揚基奪門出良玉兵掠其資并及其子女自十二月二十四日抵武昌至十六年正月申兵始去居人登蛇山以望叫呼更生曰左兵過矣良玉旣東自成遂陷承天傍掠諸州縣當是時降兵叛卒率假左軍號恣剽掠蘄州守將王



允成爲亂首破建德劫池陽去蕪湖四十里泊舟三山  
荻港漕艘鹽船盡奪以載兵聲言諸將寄帑南京請以  
親信三千人與俱南京諸文武官及操江都御史至陳  
師江上爲守禦士民一夕數徙商旅不行都御史李邦  
華被召道湖口草檄告良玉以危詞動之而令安慶巡  
撫發九江庫銀十五萬兩補六月糧軍心乃定邦華入  
見帝論良玉潰兵之罪請歸罪於王允成帝乃令良玉  
誅允成而獎其能定變良玉卒留允成於軍中不誅也  
良玉留安慶久之徐湖九江上聞獻忠破湖廣沉楚王  
於江坐視不救八月乃入武昌立軍府招徠下流粗定

分命副將吳學禮援袁州江西巡撫郭都賈惡其淫掠  
檄歸之而自募土人爲戍守會賊陷長沙吉州復陷袁  
州岳州良玉遣馬進忠援袁州馬士秀援岳州士秀率  
水師敗賊岳州城下二城遂竝復時帝命兵部侍郎呂  
大器代侯恂爲總督恂解任中道遽下獄良玉知其爲  
已故心鞅鞅與大器齟齬賊連陷建昌請府大器無兵  
不能救良玉亦不援進忠與賊戰嘉魚再失利良玉軍  
遂不振會獻忠從荆河入蜀良玉遣兵追之距荊州七  
十里荆襄諸賊因自成入關盡解良玉偵知乃遣副將  
盧光祖上隨稟承德而惠登相自均房劉洪起自南陽



騎賊後收其空虛地以自爲功十七年正月詔封良玉爲寧商伯與其子夢庚平賊將軍印功成世守武昌命給事中左懋第便道督戰良玉乃條日月進兵狀以聞疏入未奉旨聞京師被陷諸將洶洶以江南自立君請引兵東下良玉慟哭誓不許副將士秀奮曰有不奉公令復言東下者吾擊之以巨艦置礮斷江衆乃定福王立晉良玉爲侯廕一子錦衣衛正千戶且竝封黃得功高傑劉澤清劉良佐爲諸鎮俱廕子世襲而以上流之事專委良玉尋加太子太傅時李自成敗於關門良玉得以其間稍復楚西境之荊州德安承天而湖廣巡撫

何騰蛟及總督袁繼咸居江西皆與良玉善南都倚爲屏蔽良玉兵八十萬號百萬前五營爲親軍後五營爲降軍每春秋肄兵武昌諸山一山幟二色山谷爲滿軍法用兩人夾馬馳曰過對馬足動地殷如雷聲聞數里諸鎮兵惟高傑最強不及良玉遠甚然良玉自朱仙鎮之敗精銳畧盡其後歸者多烏合軍容雖壯法令不復相憚良玉家穢於許州其在武昌諸營優娼歌舞達旦良玉塊然獨處無姬侍嘗夜宴僚佐召營妓十餘人行酒履舄交錯少焉左顧而歎以次引出賓客肅然左右莫敢仰視其統馭有體爲下所服多此類而是時良玉



已老且病無中原意矣良王之起由侯恂恂故東林也  
馬士英阮大鍼用事慮東林倚良王爲難謾語修好而  
陰忌之築板磯城爲西防良王歎曰今西何所防殆防  
我耳會朝事日非監軍御史黃澍挾良王勢面觸馬阮  
旣返遣緹騎逮澍良王留澍不遣澍與諸將日以清君  
側爲請良王躊躇弗應云何有北來太子事澍借此激  
衆以報已怨召三十六營大將與之盟良王反意乃決  
傳檄討馬士英自漢口達蘄州列舟二百餘里良王疾  
已劇至九江邀總督袁繼咸入舟中袖中出密諭云自  
皇太子劫諸將盟繼咸正辭拒之部將郝效忠陰入城

縱火殘其城而去良王望城中火光曰予負袁公嘔血  
數升是夜死時刻于石

順治二年四月也諸將秘不發喪其推其子夢庚爲留  
後七日軍東下朝命黃得功渡江防勦初夢庚自立佯  
語繼咸至池州候旨抵池繼咸密以疏聞道梗不得達  
惠登相者初爲賊旣降爲良王副將諸軍自彭澤下連  
陷建德東流殘安慶城獨池州不破貽書登相曰留此  
以待後軍登相大詬曰若此則我反不如前爲流賊時  
矣如先帥未命何檄其軍返夢庚見黑旗船西上索輕  
舸追及之登相與相見大慟以夢庚不足事引兵絕江



而去諸將乃議旋師時

大清兵已下泗州逼儀真矣夢庚遂偕澗以衆降於九江鄧玘四川人天啟初從軍積功得守備安邦彥反玘追賊織金勇冠諸將已敗績河濱魯欽敗歿賊犯威清玘夜斫營走賊進都司僉書討敗苗酋李阿二自貴州用兵裨將楊明偕劉志敏張雲鵬竝驍勇不得爲大將惟玘以功名聞崇禎初屢遷四川副總兵與侯良柱共斬安邦彥京師有警率六千人勤王共復遵永四城加署都督僉事世廕千戶尋擢總兵官鎮守遵化戰喜峯口及洪山泣有功進秩爲眞五年春叛將亂登萊王洪

等無功玘自請行命爲援勦總兵官與洪及劉國柱禦賊沙河戰相當已而遁走賊乘之大敗尋與諸將金國奇等復登萊二城錄功進署都督同知玘戍遵化久思歸及登萊事竣復以爲言會賊入河北言者請令玘勦玘怏怏而行給事中范淑泰劾玘虐民帝不問旋遣近侍監其軍玘至濟源射殺王自用於善陽卽賊紫金梁也頃之走賊礮川拒却之彭城鎮與左良玉擊賊清池柳莊賊走林縣玘部將楊遇春邀賊中伏死賊用其旗并誘殺他將自是輕玘俄與良玉逐賊沙河賊圍湯陰玘被困上樵窩良玉救乃免已共破賊官村沁河清池



萬善移師畿南敗賊白草關賊犯平山敗之紅子店馬  
種川賊遁青石嶺敗之經澗村醉漢口賊犯臨城敗之  
魚桂嶺當是時賊蔓河朔及畿南天子特遣倪寵王樸  
將京軍而保定梁甫河南左良玉湯九州合玘軍足殄  
賊羣帥勢相軋彼此觀望託山深道岐以自解莫利先  
入賊遂由澗池南渡而諸帥各有近侍爲中軍事易掩  
飾所報功多不以實也十一月賊南遁玘追敗之澗池  
扣子山至宜陽盧氏而還是月以玘爲保定總兵官代  
梁甫七年正月以賊盡入郟襄命玘援勦解南漳圍尋  
敗賊胡地冲斬鬪天王九條龍草上飛抓山虎雙翼虎

勦虜縣竹山南漳賊戰獅子崖石漳山斬一隻虎滿天  
飛已擊賊洵陽也家清連戰皆捷獲首功一千有奇八  
月敘五峯山破賊功進右都督玘不善馭軍軍心亦不  
附謀於郟西玘渡河以避之總督陳奇瑜偏愆乃定奇  
瑜集諸將討竹山竹溪諸賊玘頗有功十一月賊大入  
河南命玘援勦八年春賊陷新蔡知縣王信嘉死玘  
追敗賊羅山是時賊陷鳳陽命玘自黃州速援安慶及  
桐城被圍玘竟不至御史錢守廉劾玘勦賊羅山殺良  
冒功命總督洪承疇核之四月承疇至汝州命玘戍樊  
城防漢江是月部將王允成以剋餉鼓譟殺其二僕玘



懼登樓越牆墮地死玘由小校大小數百戰所向克捷  
以久戍缺望恣其下淫掠大學士王應熊以鄉里庇之  
玘益無所憚其死也人以為逸罰云賀人龍米脂人初  
以守備隸延綏巡撫洪承疇麾下崇禎四年承疇受賊  
降命人龍勞以酒伏兵擊斬三百二十人其冬張福臻  
代承疇遣人龍勦賊党雄斬獲二百有奇明年夏從福  
臻禽賊孫守法其秋以所部援勦山西六年春與總兵  
尤世祿復遼州已敗賊垣曲絳縣進都司僉書又連破  
賊水頭鎮花池塞湯湖村會山西賊幾盡乃還陝西從  
巡撫陳奇瑜討平延川賊俘斬一千有奇奇瑜擢總督

以人龍自隨七年四月擊賊隰州禽魁天虎進參將奇  
瑜追賊鄖襄與漢人龍並有功賊軼車箱峽陷隴州西  
去奇瑜遣人龍救之甫入隴州李自成復至環攻以人  
龍同里閼遣其將高傑移書令反人龍不報固守兩月  
左光先救至圍始解十二月敗賊中莊明年正月鳳陽  
陷總督洪承疇遣人龍馳救敗賊睢州進副總兵承疇  
以陝西急率人龍入關商洛賊馬光玉等薄西安距大  
軍五十里承疇命人龍入子午谷邀賊之南別將劉成  
功王承祥邀賊之北張全昌從咸陽繞興平東賊以此  
不敢南遁盡走武功扶風又渡渭走郿縣承疇追至王



渠鎮賊方掠南山人龍成功等與戰追奔三十里至大泥峪賊棄馬登山走七月高迎祥張獻忠掠秦安清水人龍偕全昌破之張家川已而失利都司田應龍等死八月高傑降承疇令人龍及遊擊孫守法挾之趨富平乘夜擊敗賊人龍尋移守延綏九年七月從巡撫孫傳庭大破賊蓋屋禽迎祥九月惠登相等屯寶雞承疇遣人龍等往擊戰於賈家村追奔爲賊所截川將會榮燿等來援敗去人龍坐褫官立功十年小紅狼圍漢中瑞王告急承疇率人龍兵由兩當趨救賊解去詔復人龍官徽秦逸賊東趨平鳳人龍躡至柳林不利賊窺西安

人龍禦之斬獲多其冬自成登相入四川承疇率人龍等往援歲暮至廣元賊已逼成都自成別由松潘還陝右十一年承疇督人龍等自階文窮追自成走入西羌界人龍與曹變蛟等大戰二十七日自成引殘卒入塞窟山中謀入四川爲人龍及馮科所追突漢中扼於左光先其黨祁總管降自成幾滅詳變蛟傳其冬京師戒嚴擢人龍總兵官帥師入衛人龍所部多降賊至山西而謀尋撫定抵京與變蛟等奏捷於太平明年事定還陝西其秋張獻忠羅汝才叛謀入陝人龍及副將李國奇等扼之興安乃入川東楊嗣昌檄陝西總督鄭崇儉



率人龍國奇軍會勦十二月人龍擊賊大敗之十三年  
二月與左良王大破賊瑪瑙山人龍得一千三百餘級  
降賊將二十五人六月汝才登相犯開縣總兵鄭嘉棟  
擊之仙寺嶺人龍擊之馬弱溪共斬首一千二百汝才  
登相東西走追之不能及時賊盡集於川監軍萬元吉  
令川將守巴巫諸隘人龍國奇及楚將張應元汪雲龍  
張奏凱專主追擊及應元軍入夔營土地嶺人龍逗留  
不至諸軍遂大敗人龍竟還陝已而獻忠汝才陷劍州  
趙廣元將從間道入漢中人龍拒之陽平百丈二關賊  
乃退十二月嗣昌至重慶三檄人龍會師不至初嗣昌

惡左良玉許人龍代為平賊將軍及賊瑪瑙山良玉功  
第一嗣昌語人龍姑待之人龍大失望效良玉所為不  
奉約束嗣昌亦不能制賊陷瀘州而北人龍屯小市廂  
隔一水不擊賊遂越成都走漢州傳陽人龍軍入操而  
歸十四年三月嗣昌卒丁啟睿代令人龍國奇出當陽  
擊敗自成於靈寶山中人龍子大明戰歿九月總督傅  
宗龍統人龍國奇軍出關次新蔡遇賊孟家莊將戰人  
龍先走國奇戰不勝亦走宗龍遂歿十五年正月總督  
汪喬年出關擊賊人龍及鄭嘉棟牛成虎從至襄城遇  
賊復不戰走喬年亦歿帝大怒欲誅之慮其為變姑奪



職戴罪視事及孫傳庭督師陝西帝授以意人龍駐咸陽虞禍曉夜爲備傳庭以人龍家米脂其宗族多在賊中未可輕發在道佯上疏曰人龍臣舊將願貰其罪俾從臣自效帝亦佯許之人龍稍自安傳庭至陝密與巡撫張爾忠謀以五月朔召人龍計事數其罪斬之其部將周國卿將精卒二百人與同黨魏大亨賀國賢高進庫等將逃還涇陽取其孥與賊爲亂爾忠遣參將孫守法先入涇陽質其妻子國卿窮謀斬大亨等以降爾忠密聞之大亨遂斬國卿函送其首他部將高傑高汝利賀勇董學禮等十四人俱仍故官一軍乃定

高傑米脂人與李自成同邑同起爲盜崇禎七年閏八月總督陳奇瑜遣參將賀人龍救隴州被圍大困自成令傑遺書約人龍反不報使者歸先見傑後見自成比圍城兩月不拔自成心疑傑遣別部將往代傑歸守營自成妻邢氏趨武多智掌軍資每日支糧仗傑過氏營分合符驗氏偉傑貌與之通恐自成覺謀歸降次年八月遂竊邢氏來歸洪承疇以付人龍使其遊擊孫守法挾以破賊取立效爲信自是傑常隸人龍麾下十三年張獻忠敗於瑪瑙山竄興歸界上傑隨人龍及副將李國奇大敗之鹽井十五年人龍以罪誅命傑爲賞授遊



擊十月陝西總督孫傳庭至南陽自成與羅汝才西行  
逆之傳庭以傑與魯某爲先鋒遇於塚頭大戰敗賊追  
奔六十里汝才見自成敗來救遠出官軍後後軍左勦  
望見賊怖而先奔衆軍皆奔遂大潰傑所亡失獨少十  
六年進副總兵與總兵白廣恩爲軍鋒兩人皆降將也  
廣恩鷙鷙素不奉約束而傑尤凶暴朝廷以傑爲自成  
所切齒故命隸傳庭辦賊九月從傳庭克寶豐復郟縣  
時官軍乘勝深入乏食降將李際遇通賊自成帥精騎  
大至傳庭問計於諸將傑請戰廣恩不可傳庭以廣恩  
爲怯廣恩不懌引所部遁去官軍接戰陷伏中傑登嶺

上望之曰不可支矣亦麾衆退軍遂大奔死者數萬廣  
恩走汝州不救傑乃隨傳庭走河北已而自山西渡河  
轉入潼關廣恩已先至十一月自成攻關廣恩力戰而  
傑怨廣恩以寶豐之敗不救已亦擁衆不肯救廣恩戰  
敗關遂破傳庭被殺自成破西安據之傑北走延安賊  
將李過追傑傑東走宜川河冰適合遂渡入蒲津以守  
賊至冰解不得渡乃免廣恩旣敗走固原爲賊將追及  
遂以城降十七年進傑總兵帝令總督李化熙率傑兵  
馳救山西而蒲州平陽已陷久傑退至澤州沿途大掠  
賊遂薄太原京師陷傑南走福王封傑與平伯列於四



鎮領揚州駐城外傑固欲入城揚州民畏傑不納傑攻城急日掠廂村婦女民益惡之知府馬鳴騅推官湯來賀堅守月餘傑知不可攻意稍息閣部史可法議以瓜州子傑乃止九月命傑移駐徐州以左中允衛允文兼兵科給事中監其軍西討徐州土賊程繼孔被禽至京師乘李自成亂逃歸十二月傑禽斬之加太子少傅廕一子世襲錦衣僉事初傑伏兵要擊黃得功於土橋得功幾不免兩鎮遂相仇怨事見得功傳傑爭揚州時可法頗爲所窘至是傑感可法忠與謀恢復議調得功與劉澤清二鎮赴祁宿防河傑自提兵直趨歸關且瞰宛

洛荆襄以爲根本遂具疏上之語激切且云得功與臣猶介介前事臣知報君雪恥而已安能與同列較短長哉然得功終不欲爲傑後勁而澤清尤狡橫難任可法不得已調劉良佐赴徐與傑爲聲援

順治二年正月傑抵歸德總兵許定國方駐睢州有言其送子渡河者傑招定國來會不應復邀巡撫趙其杰巡按陳潛共同往睢州定國始郊逆其杰諷傑勿入城傑心輕定國不聽遂入城十一日定國置酒享傑傑飲酣爲定國刻行期且微及送子事定國益疑無離睢意傑固促之行定國怒夜伏兵傳礮大呼其杰等急遁走



傑醉臥帳中未起衆擁至定國所殺之先是傑以定國將去睢盡發兵戍開封所留親卒數十人而已定國爲恭順多選妓侍傑而以二妓偶一卒寢卒盡醉及聞礮欲起爲二妓所掣不得脫皆死明日傑部下至攻城老弱無孑遺定國走降

大清軍傑爲人淫毒揚民間其死皆相賀然是行也進取意甚銳故時有惜之者始朝廷許諸鎮與聞國是故傑屢條奏救降賊者及請釋武愷於獄不允復疏薦吳甡鄭三俊金光辰姜琛熊開元金聲沈正宗等大抵其時武臣風尚多類此傑死贈太子太保以其子元爵襲

興平伯劉澤清曹縣人以將材授遼東寧前衛守備遷山東都司僉書加參將崇禎三年

大清兵攻鐵廠欲據以絕豐潤糧道援守三屯總兵楊肇基遣澤清來援未至鐵廠一十五里遇

大兵力戰自辰至午不決得濟師轉戰至遵化夾擊遂得入城敘功加二級至副總兵五年以侵剋軍糧被劾詔立功衝要地六年遷總兵其冬加左都督恢復登州有功八年詔統山東兵防漕九年京師戒嚴統兵入衛令駐新城爲南北控扼復命留守通州加左都督太子太師十三年五月山東大饑民相聚爲寇曹濮尤甚帝



命澤清會總兵楊御蕃兵勦捕之八月降右都督鎮守山東防海澤清以生長山東久鎮東省非宜請辭任帝令整旅渡河合諸鎮星馳援勦十六年二月賊圍開封久澤清赴援以朱家寨去汴八里提五千人南渡倚河爲寨疏水環之欲以次結八寨達大堤築甬道饋饜城中壁壘未成賊來爭相持三日互有殺傷澤清卽命拔營去惶擾奔迸士爭舟多溺死者澤清爲人性恆怯懷私觀望嘗妄報大捷邀賞賜又詭稱墮馬被傷詔賚藥資四十兩命赴保定勦賊不從日大掠臨清率兵南下所至焚劫一空寇氛日急給事中韓如愈馬嘉植皆謀

奉使南歸如愈常劾澤清過東昌澤清遣人殺之於道無敢上聞者京師陷澤清走南都福王以爲諸鎮之一封東平伯駐廬州時武臣各占分地賦入不以上供恣其所用置封疆兵事一切不問與廷臣互分黨援干預朝政排擠異己奏牘紛如紀綱盡裂而澤清所言尤狂悖王初立即援靖康故事請以今歲五月改元又請宥故輔周延儒助餉賊銀都御史劉宗周劾諸將跋扈狀澤清遂兩疏劾宗周且曰上若誅宗周臣卽卸職朝廷不得已溫詔解之又請禁巡按不得拏訪追賊請法司嚴緝故總督侯恂及其子方域朝廷皆曲意從之



順治二年四月揚州告急命澤清等往援而澤清已潛謀輸款矣

大清惡其反覆磔誅之澤清頗涉文藝好吟咏嘗召客飲酒唱和幕中蓄兩猿以名呼之卽至一日宴其故人子酌酒金甌中甌可容三升許呼猿捧酒跪送客猿爭獍甚客戰掉逡巡不敢取澤清笑曰君怖耶命取囚撲死堦下剗其腦及心肝置甌中和酒付猿捧之前飲醜顏色自若其兇忍多此類

祖寬遼東人少有勇力給侍祖大壽家從軍有功累官寧遠參將部卒多塞外降人所向克捷崇禎五年七月叛將李九成等圍萊州急詔發關外兵討之寬與斬圍臣祖大弼張韜率兵抵昌邑巡撫朱大與獲賊書約寬等爲內應以示寬等皆誓滅賊以自明乃用寬國臣爲前鋒寬至沙河與賊遇衆寡不敵稍却會國臣至拔刀大呼直前寬大弼韜咸殊死戰大敗賊兵逐北抵城下立解萊州圍是月晦進兵黃縣賊傾巢出戰寬等復大敗之遂與劉澤清等築長圍以困登州明年二月賊始平語詳大典傳寬以解圍功進都督僉事再敘功世廕外衛副千戶進副總兵八年秋命爲援勦總兵官督關外兵三千討流賊十月至河南巡撫陳必謙監紀推官



湯開遠令與左良玉抵靈寶至則挫張獻忠於焦村無  
何高迎祥李自成至與獻忠合攻閩鄉寬赴救賊解而  
趨靈寶斷良玉寬軍不相應遂東陷陝州攻洛陽良玉  
寬至迎祥自成獻忠皆走良玉追迎祥而寬分擊獻忠  
夜督副將祖克勇等趨葛家莊黎明遇賊大破之賊奔  
嵩縣九臯山寬伏二軍於山溝誘之賊趨下伏發斬賊  
九百有奇尋與副將劉肇基羅岱遇賊汝州圯料鎮復  
大敗賊伏屍二十餘里斬賊千六百有奇獻忠憤合迎  
祥自成兵與寬戰龍門白沙截官軍爲二寬自斷後士  
卒殊死鬪自晨至夜分復大捷斬賊一千有奇迎祥自

成乃走窺光州寬督副將李輔明躡其後賊走攻確山  
寬等馳救大破之斬賊五百八十有奇自成等遂東走  
廬州攻圍七晝夜明年正月寬等至城奔全椒遂圍滁  
州南京太僕卿李覺斯知州劉大鞏力禦之而寬等軍  
至奮擊大呼諸軍無不一當百自晨至晡賊大敗從城  
東五里追至關山之朱龍橋橫屍枕籍水爲不流二月  
又從總理盧象昇破賊七頂山殲自成精卒殆盡象昇  
移軍南陽命寬備鄧州會賊渡漢江入郢襄餘衆三萬  
匿內鄉浙川山中象昇命寬與祖大樂等入山搜討邊  
軍強愍性異他卒不可以法繩往時官軍多關中人與



明史卷二百七十三  
列傳 兵  
賊鄉里臨陣相勞苦拋生口棄輜重卽縱之去謂之打  
活仗邊軍不通言語逢賊卽殺故多勝然所過焚廬舍  
淫婦女恃功不戢又利野戰憚搜山且見賊遠竄非旬  
朔可定自以爲客將無持久心寬卒方過河謀而逸象  
昇激勸再三始聽命至黨子口仍按甲不行而總兵李  
重鎮素懼怯冀卸責衆益思歸象昇乃力陳入山搜勦  
之難請令寬重鎮赴關中討賊會總督洪承疇亦請之  
寬等遂移軍陝西隸承疇麾下八月京師被兵召入衛  
錄滁州功進右都督資銀幣事定命赴寧遠協守十二  
年冬詔寬率師援畿輔及山東告急寬逗遛明年正月

濟南失守褫職被逮坐失陷藩封竟棄市寬敢戰有功  
稱驍將性剛使氣不爲文吏所喜卒致大辟莫爲論救  
贊曰左良玉以驍勇之材頻殲劇寇遂擁強兵驕亢自  
恣緩則養寇以貽憂急則棄甲以致潰當時以不用命  
罪諸將者屢矣而良玉偃蹇僨事未正刑章姑息釀患  
是以卒至稱兵犯關而不顧也高傑祖寬皆剛悍難馴  
恃功不戢而傑尤爲兇鶩然傑被戕於銳意進取之時  
寬受誅於力戰赴援之後死非其罪不能無遺憾焉

明史卷二百七十三終







象昇大舉討賊改可法副使分巡安慶池州監江北諸軍黃梅賊掠宿松潛山太湖將犯安慶可法追擊之潛山天堂寨明年祖寬破賊滁州賊走河南十二月賊馬守應合羅汝才李萬慶自鄖陽東下可法馳駐太湖扼其衝十年正月賊從間道突安慶石碑尋移桐城參將潘可大擊走賊賊復爲廬鳳軍所扼回桐城掠四境知縣陳爾銘嬰城守可法與可大勦捕賊走廬江犯潛山可法與左良玉敗之楓香驛賊乃竄潛山太湖山中三月可大及副將程龍敗歿於宿松賊分其黨搖天動別爲一營而合八營二十餘萬衆分屯桐城之練潭石井

陶冲總兵官牟文綬劉良佐擊敗之挂車河當是時陝寇聚漳寧分犯岷洮秦楚應皖羣盜遍野總理盧象昇既改督宣大代以王家禎祖寬關外兵亦北歸未幾上復以熊文燦代家禎專撫賊賊益狂逞盤牙江南北南都震驚七月擢可法右僉都御史巡撫安慶廬州太平池州四府及河南之光州光山固始羅田湖廣之蘄州廣濟黃梅江西之德化湖口諸縣提督軍務設額兵萬人賊已東陷和州含山定遠六合犯天長盱眙趨河南可法奏免被災田租冬部將汪雲鳳敗賊潛山京軍復連破老回回舒城廬江賊遁入山時監軍僉事湯開遠善



擊賊可法東西馳禦賊稍稍避其鋒十一年夏以平賊  
踰期戴罪立功可法短小精悍面黑目爍爍有光廉信  
與下均勞苦軍行士不飽不先食未授衣不先禦以故  
得士死力連敗賊英山六合順天王乞降十二年夏丁  
外艱去服闋起戶部右侍郎兼右僉都御史代朱大典  
總督漕運巡撫鳳陽淮安揚州劾罷督糧道三人增設  
漕儲道一人大濬南河漕政大釐拜南京兵部尚書參  
贊機務因武備久弛奏行更新八事十七年四月朔聞  
賊犯闕誓師勤王渡江抵浦口聞北都既陷縞衣發喪  
會南都議立君張慎言呂大器姜曰廣等曰福王由崧

神宗孫也倫序當立而有七不可貪淫酗酒不孝虐下  
不讀書干預有司也潞王常務神宗姪也賢明當立移  
牒可法可法亦以爲然鳳陽總督馬士英潛與阮大鍼  
計議主立福王咨可法可法以七不可告之而士英已  
與黃得功劉良佐劉澤清高傑發兵送福王至儀真於  
是可法等迎王五月朔王謁孝陵奉先殿出居內守備  
府羣臣入朝王色赧欲避可法曰王母避宜正受既朝  
議戰守可法曰王宜素服郊次發師北征示天下以必  
報讐之義王唯唯明日再朝出議監國事張慎言曰國  
虛無人可遂卽大位可法曰太子存亡未卜倘南來若



何誠意伯劉孔昭曰今日既定誰敢復更可法曰徐之  
乃退又明日王監國廷推閣臣衆舉可法高弘圖姜曰  
廣孔昭攘臂欲並列衆以本朝無勛臣入閣例過之孔  
昭勃然曰卽我不可馬士英何不可乃并推士英又議  
起廢推鄭三俊劉宗周徐石麒孔昭舉大鉞可法曰先  
帝欽定逆案毋復言越二日拜可法禮部尙書兼東閣  
大學士與士英弘圖並命可法仍掌兵部事士英仍督  
師鳳陽乃定京營制如北都故事侍衛及錦衣衛諸軍  
悉入伍操練錦衣東西兩司房及南北兩鎮撫司官不  
備設以杜告密安人心當是時士英旦夕冀入相及命

下大怒以可法七不可書奏之王而擁兵入覲拜表卽  
行可法遂請督師出鎮淮揚十五日王卽位明日可法  
陛辭加太子太保改兵部尙書武英殿大學士士英卽  
以是日入直議分江北爲四鎮東平伯劉澤清轄淮海  
駐淮北經理山東一路總兵官高傑轄徐泗駐泗水經  
理開歸一路總兵官劉良佐轄鳳壽駐臨淮經理陳杞  
一路靖南伯黃得功轄滁和駐廬州經理光固一路可  
法啟行卽遣使訪大行帝后梓宮及太子三王所在奉  
命祭告泗鳳二陵可法去士英孔昭輩益無所憚孔昭  
以慎言舉異對譚殿上拔刀逐慎言可法馳疏解孔昭



卒扼牲不用可法祭二陵畢上疏曰陛下踐祚初祇謁孝陵哭泣盡哀道路感動若躬謁二陵親見鳳泗蒿萊滿目鷄犬無聲當益悲憤願慎終如始處深宮廣廈則思東北諸陵魂魄之未安享玉食大庖則思東北諸陵麥飯之無展磨圖受錄則念先帝之集木馭朽何以忽邁危亡早朝晏罷則念先帝之克儉克勤何以卒隳大業戰兢惕厲無時怠荒二祖列宗將默佑中興若晏處東南不思遠畧賢奸無辨威斷不靈老成投簪豪傑裹足祖宗怨恫天命潛移東南一隅未可保也王嘉答之得功澤清傑爭欲駐揚州傑先至大殺掠屍橫野城中

將僅登陴守傑攻之浹月澤清亦大掠淮上臨淮不納良佐軍亦被攻朝命可法往解得功良佐澤清皆聽命乃詣傑傑素憚可法可法來傑夜掘坎十百埋暴骸旦日朝可法帳中辭色俱變汗浹背可法坦懷待之接偏裨以溫語傑大喜過望然傑亦自是易可法用已甲士防衛文檄必取視而後行可法夷然爲具疏屯其衆於瓜洲傑又大喜傑去揚州以安可法乃開府揚州六月大清兵擊敗賊李自成自成棄京師西走青州諸郡縣爭殺僞官據城自保可法請頒監國登極二詔慰山東河北軍民心開禮賢館招四方才智以監紀推官應廷



吉領其事八月出巡淮安閱澤清士馬返揚州請餉爲  
進取資士英靳不發可法疏趣之因言邇者人才日耗  
仕途日淆由名心勝而實意不修議論多而成功少今  
事勢更非昔比必專主討賊復讐舍籌兵籌餉無議論  
舍治兵治餉無人才有撫拾浮談巧營華要者罰無赦  
王優詔答之初可法虞傑跋扈駐得功儀真防之九月  
朔得功傑構兵曲在傑賴可法調劑事得解北都降賊  
諸臣南還可法言諸臣原籍北土者宜令赴吏兵二部  
錄用否則恐絕其南歸之心又言北都之變凡屬臣子  
皆有罪在北者應從死豈在南者非人臣卽臣可法謬

典南樞臣士英叨任鳳督未能悉東南甲疾趨北援鎮  
臣澤清傑以兵力不支折而南走是首應重論者臣等  
罪也乃因聖明總統鉄鉞未加恩榮疊被而獨於在北  
諸臣毛舉而槩繩之豈散秩閒曹責反重於南樞鳳督  
哉宜摘罪狀顯著者重懲示儆若僞命未汚身被刑辱  
可置勿問其逃避北方徘徊而後至者許戴罪討賊赴  
臣軍前酌用廷議並從之傑居揚州桀驁甚可法開誠  
布公導以君臣大義傑大感悟奉約束十月傑帥師北  
征可法赴清江浦遣官屯田開封爲經畧中原計諸鎮  
分汛地自王家營而北至宿遷最衝要可法自任之



日身卷三十四 列傳 一  
壘緣河南岸十一月四日舟次鶴鎮謀報我

大清兵入宿遷可法進至白洋河令總兵官劉肇基往  
援

大清兵還攻邳州肇基復援之相持半月而解時自成  
既走陝西猶未滅可法請頒討賊詔書言自三月以來  
大警在目一矢未加昔晉之東也其君臣日圖中原而  
僅保江左宋之南也其君臣盡力楚蜀而僅保臨安蓋  
偏安者恢復之退步未有志在偏安而遠能自立者也  
大變之初黔黎洒泣紳士悲哀猶有朝氣今則兵驕餉  
絀文恬武嬉頓成暮氣矣河上之防百未經理人心不

肅威令不行復讐之師不聞及關陝討賊之詔不聞達  
燕齊君父之讐置諸膜外夫我卽卑宮非食嘗膽卧薪  
聚才智精神枕戈待旦合方州物力破釜沉舟尙虞無  
救以臣觀廟堂謀畫百執事經營殊未盡然夫將所以  
能克敵者氣也君所以能禦將者志也廟堂志不奮則  
行間氣不鼓夏少康不忘出寶之辱漢光武不忘蕪薪  
之時臣願陛下爲少康光武不願左右在位僅以晉元  
宋高之說進也先皇帝死於賊恭皇帝亦死於賊此千  
古未有之痛也在北諸臣死節者無多在南諸臣討賊  
者復少此千古未有之恥也庶民之家父兄被殺尙思



大胸斷脛得而甘心况在朝廷顧可漠置臣願陛下速發討賊之詔責臣與諸鎮悉簡精銳直指秦關縣上爵以待有功假便宜而責成效絲綸之布痛切淋漓庶海內忠臣義士聞而感憤也國家遭此大變陛下嗣登大寶與先朝不同諸臣但有罪之當誅曾無功之足錄今恩外加恩未已武臣腰玉名器濫觴自後宜慎重務以爵祿待有功庶猛將武夫有所激厲兵行最苦無糧搜括既不可行勸輸亦難爲繼請將不急之工程可已之繁費朝夕之燕衍左右之進獻一切報罷卽事關典禮亦宜槩從節省蓋賊一日未滅卽有深宮曲房錦衣玉

食豈能安享必刻刻在復讐思恥振舉朝之精神萃萬方之物力盡并於選將練兵一事庶人心可鼓天意可回可法每繕疏循環諷誦聲淚俱下聞者無不感泣比大清兵已下邳宿可法飛章報上英謂人曰渠欲救防河將士功耳慢弗省而諸鎮巡巡無進師意且數相攻明年是爲

大清順治之二年正月餉缺諸軍皆饑頃之河上告警詔良佐得功率師扼潁壽傑進兵歸徐傑至睢州爲許定國所殺部下兵大亂屠睢旁近二百里殆盡變聞可法流涕頓足歎曰中原不可爲矣遂如徐州以總兵李



本身爲提督統傑兵本身者傑甥也以胡茂順爲督師  
中軍李成棟爲徐州總兵諸將各分地又立傑子元爵  
爲世子請恤於朝軍乃定傑軍旣還於是大梁以南皆  
不守士英忌可法威名加故中允衛允文兵部右侍郎  
總督與平軍以奪可法權允文傑同鄉也陷賊南還傑  
請爲己監軍傑死允文承士英旨疏請可法士英喜故  
有是命駐揚州二月可法還揚州未至得功來襲興平  
軍城中大懼可法遣官講解乃引去時大兵已取山東  
河南北逼淮南四月朔可法移軍駐泗州護祖陵將行  
左良玉稱兵犯關召可法入援渡江抵燕子磯得功已

敗良玉軍可法乃趨天長檄諸將救盱眙俄報盱眙已  
降

大清泗州援將侯方巖全軍沒可法一日夜奔還揚州  
訛傳定國兵將至殲高氏部曲城中人悉斬關出舟楫  
一空可法檄各鎮兵無一至者二十日

大清兵大至屯班竹園明日總兵李棲鳳監軍副使高  
岐鳳拔營出降城中勢益單諸文武分陴拒守舊城西  
門險要可法自守之作書寄母妻且曰死葬我高皇帝  
陵側越二日

大清兵薄城下礮擊城西北隅城遂破可法自刎不殊



一參將擁可法出小東門遂被執可法大呼曰我史督師也遂殺之揚州知府任民育同知曲從直王纘爵江都知縣周志畏羅伏龍兩淮鹽運使楊振熙監餉知縣吳道正江都縣丞王志端賞功副將汪思誠幕客盧涓等皆死可法初以定策功加少保兼太子太保以太后至加少傅兼太子太傅敘江北戰功加少師兼太子太師禽劇盜程繼孔功加太傅皆力辭不允後以宮殿成加太師力辭乃允可法爲督師行不張蓋食不重味夏不簟冬不裘寢不解衣年四十餘無子其妻欲置妾太息曰王事方殷敢爲兒女計乎歲除遣文牒至夜半倦

索酒庖人報殺肉已分給將士無可佐者乃取鹽豉下之可法素善飲數斗不亂在軍中絕飲是夕進數十觥思先帝泣然淚下凭几卧比明將士集轅門外門不啟左右遙語其故知府民育曰相公此夕卧不易得也命鼓人仍擊四鼓戒左右毋驚相公須臾可法寤聞鼓聲大怒曰誰犯吾令將士述民育意乃獲免嘗子處鈴閣或舟中有言宜警備者曰命在天可法死覓其遺骸天暑衆屍蒸變不可辨識踰年家人舉袍笏招魂葬於揚州郭外之梅花嶺其後四方弄兵者多假其名號以行故時謂可法不死云可法無子遺命以副將史德威爲



明史卷三百七十四 列傳 十一  
之後有弟可程崇禎十六年進士擢庶吉士京師陷降  
賊賊敗南歸可法請置之理王以可法故令養母可程  
遂居南京後流寓宜興閩四十年而卒任民育字時澤  
濟寧人天啟中鄉舉善騎射真定巡撫徐標請於朝用  
爲贊畫理屯事真定失南還福王時授亳州知州以才  
擢揚州知府可法倚之城破緋衣端坐堂上遂見殺闔  
家男婦盡赴井死從直遼東人與其子死東門纘爵鄞  
人工部尙書佐孫志畏亦鄞人進士年少好氣數遭傑  
將士窘辱求解職會伏龍至可法命代之伏龍新喻人  
故梓潼知縣受代甫三日振熙臨海人道正餘姚人志

端孝豐人思誠字純一貴池人渭字渭生長洲諸生可  
法出鎮淮揚渭等伏闕上書言秦檜在內李綱居外宋  
終北轅不納居禮賢館久可法才渭渭方歲貢當得官  
不受職而擬授崑山歸昭等二十餘人爲通判推官知  
縣甫二旬城陷渭監守鈔關投於河昭死西門從死者  
十七人時同守城死者又有遵義知府何剛庶吉士吳  
爾壘而揚州諸生殉義者有高孝纘王士琇王纘王績  
王績等又有武生戴之藩醫者陳天拔畫士陸愉義兵  
張有德市民馮應昌舟子徐某並自盡他婦女死節  
不可勝紀何剛字慈人上海人崇禎三年舉於鄉見海



內大亂慨然有濟世之志交天下豪俊與東陽許都善  
語之曰子所居天下精兵處盡練一旅以待用都諾而  
去十七年正月入都上書言國家設制科立資格以約  
束天下豪傑此所以弭亂非所以戡亂也今日救生民  
匡君國莫急於治兵陛下誠簡強壯英敏之士命知兵  
大臣教習之講韜鈴練筋骨拓膽智時召而試之學成  
優其秩寄以兵柄必能建奇功臣讀戚繼光書繼光數  
言義烏東陽兵可用誠得召募數千加之訓練準繼光  
遺法分布河南郡縣大寇可平因薦都及錢塘進士姚  
奇允桐城諸生周岐陝西諸生劉湘客絳州舉人韓霖

帝壯其言卽擢剛職方主事募兵金華而都作亂已前  
死霖亦爲賊用剛不知故並薦之剛出都都城陷馳還  
南京先是賊逼京師剛友陳子龍夏允彝將聯海舟達  
天津備緩急募卒二千人至是令剛統之子龍入爲兵  
科言防江莫如水師更乞廣行召募委剛訓練從之剛  
乃上疏言臣請陛下三年之內宮室不必修百官禮樂  
不必備惟日求天下才智者決策廉者理財勇者禦敵  
爵賞無出此三者則國富兵強大敵可服若以驕悍之  
將馭無制之兵空言恢復是却行而求前也優游歲月  
潤色偏安錮豪傑於草間迫梟雄爲盜賊是株守以待



盡也惟廟堂不以浮文取士而以實績課人則真才皆爲國用而議論亦省矣分遣使者羅草澤英豪得才多者受上賞則梟傑皆畢命封疆而盜魁亦少矣東南人滿徙之江北或賜爵或贖罪則豪右皆盡力南畝而軍餉亦充矣時不能用尋進本司員外郎以其兵隸史可法可法大喜得剛剛亦自喜遇可法知已士英惡之出剛遵義知府可法垂涕曰子去吾誰仗剛亦泣願死生無相背踰月揚州被圍佐可法拒守城破投井死吳爾璵崇德人崇禎十六年進士授庶吉士賊敗南還謁可法請從軍贖罪可法遂留參軍事其父之屏方督學福

建爾璵斷一指昇故人祝淵曰君歸語我父母悉出私財昇我餉軍我他日不歸以指葬可也從高傑北征至睢州傑被難爾璵流寓祥符遇一婦人自言福王妃爾璵因守臣附疏以進詔斥其妄言逮之可法爲救免後守揚州新城投井死

高弘圖字研文膠州人萬曆三十八年進士授中書舍人擢御史椈稜自持不依麗人天啟初陳時政八患請用鄒元標趙南星巡按陝西題薦屬吏趙南星糾之弘圖不能無望代還移疾去魏忠賢亟攻東林其黨以弘圖嘗與南星有隙召起弘圖故官入都則楊漣左光斗



魏大中等已下詔獄鍛鍊嚴酷弘圖果疏論南星然言國是已明雷霆不宜頻擊詔獄諸臣生殺宜聽司敗法則頗謂忠賢過當者疏中又引漢元帝乘船事忠賢方導帝遊幸不悅矯旨切責之後諫帝母出蹕東郊又極論前陝西巡撫喬應甲罪又嘗語刺崔呈秀呈秀應甲皆忠賢黨由是忠賢大怒擬順天巡按不用弘圖乞歸遂令閒住莊烈帝卽位起故官劾罪田詔劉志選梁夢環擢太僕少卿復移疾去三年春召拜左僉都御史進左副都御史五年遷工部右侍郎方入署總理戶工二部中官張夔憲來會弘圖恥之不與共坐七疏乞休帝

怒遂削籍歸家居十年不起十六年召拜南京兵部右侍郎就遷戶部尙書明年三月京師陷福王立改弘圖禮部尙書兼東閣大學士疏陳新政八事一宣義問請聲逆賊之罪鼓發忠義一勤聖學請不俟釋服日御講筵一設記注請召詞臣入侍日記言動一睦親藩請如先朝踐極故事遣官齎聖書慰問一議廟祀請權附列聖神主於奉先殿仍於孝陵側望祀列聖山陵一嚴章奏請禁奸宄小人借端妄言脫罪僥倖一收人心請蠲江北河南山東田租毋使賊徒藉口一擇詔使請遣官招諭朝鮮示牽制之勢並褒納焉當是時朝廷大議多



出弘圖手馬士英疏薦阮大鍼弘圖不可士英曰我自任之乃命大鍼假冠帶陛見大鍼入見歷陳寃狀以弘圖不附東林引爲證弘圖則力言逆案不可翻大鍼士英並怒一日閣中語及故庶吉士張溥士英曰我故人也死酌而哭之姜曰廣笑曰公哭東林者亦東林耶士英曰我非畔東林者東林拒我耳弘圖因縱臆之士英意解而劉宗周劾疏自外至大鍼宣言曰廣實使之於是士英怒不可止而薦張捷謝陞之疏出朝端益水火矣內札用戶部侍郎張有譽爲尙書弘圖封還具奏力諫卒以廷推簡用中官議設東廠弘圖爭不得遂乞休

不許加太子少師改戶部尙書文淵閣尋以太后至進太子太保其年十月弘圖四疏乞休乃許之弘圖既謝政無家可歸流寓會稽國破逃野寺中絕粒而卒  
姜曰廣字居之新建人萬曆末舉進士授庶吉士進編修天啟六年奉使朝鮮不攜中國一物往不取朝鮮一錢歸朝鮮人爲立懷潔之碑明年夏魏忠賢黨以曰廣東林削其籍崇禎初起右中允九年積官至吏部右侍郎坐事左遷南京太常卿遂引疾去十五年起詹事掌南京翰林院莊烈帝嘗言曰廣在講筵言詞激切朕知其入每優容之北都變聞諸大臣議所立曰廣呂大器



用周鑑雷續祚言主立潞王而諸帥奉福藩至江上於是文武官並集內官宅韓贊周令各署名籍曰廣曰無恩遽請祭告奉先殿而後行明日至奉先殿諸勲臣語侵史可法曰廣呵之於是羣小咸目攝曰廣廷推閣臣以曰廣異議不用用史可法高弘圖馬士英及再推詞臣以王鐸陳子壯黃道周名上而首曰廣乃改曰廣禮部尚書兼東閣大學士與鐸並命鐸未至可法督師揚州曰廣與弘圖協心輔政而士英挾擁戴功內結勲臣朱國弼劉孔昭趙之龍外連諸鎮劉澤清劉良佐等謀擅朝權深忌曰廣未幾士英特薦起阮大鍼曰廣力爭不得遂乞休言前見文武交競既慙無術調和近睹逆案忽翻又愧不能寢弼遂乘先帝十七年之定力反陛下數日前之明詔臣請以前事言之臣觀先帝之善政雖多而以堅持逆案爲尤美先帝之害政間有而以頻出口宣爲亂階用閣臣內傳矣用部臣勲臣內傳矣用大將用言官內傳矣而所得閣臣則淫貪巧猾之周延儒也逢君媿民奸險刻毒之溫體仁楊嗣昌也偷生從賊之魏藻德也所得部臣則陰邪貪狡之王永光陳新甲所得勲臣則力阻南遷盡撤守禦狂穉之李國禎所得大將則統絳支離之王樸倪寵所得言官則貪橫無



賴之史堇陳啟新也凡此皆力排衆議簡自中旨後效  
可睹今又不然不必僉同但求面對立談取官陰奪會  
推之柄陽避中旨之名決廉恥之大防長便佞之惡習  
此豈可訓哉臣待罪綸扉苟好盡言終蹈不測之禍聊  
取充位又來鮮恥之譏願乞骸骨還鄉里得旨慰留士  
英大鉞等滋不悅國弼孔昭遂以誹謗先帝誣讎忠臣  
李國楨爲言交章攻之劉澤清故附東林擁立議起亦  
主潞王至是入朝則力詆東林以自解免且日中興所  
恃在政府今用輔臣宜令大帥僉議曰廣愕然越數日  
澤清疏劾呂大器雷縯祚而薦張捷鄒之麟張孫振劉

光斗等已又請免故輔周延儒賊曰廣曰是欲漸于朝  
政也乃下部議竟不許曰廣嘗與士英交詆王前宗室  
朱統鑣者素無行士英啖以官使擊曰廣澤清又假諸  
鎮疏攻劉宗周及曰廣以三案舊事及迎立異議爲言  
請執下法司正謀危君父之罪頃之統鑣復劾曰廣五  
大罪請并劉士楨王重楊廷麟劉宗周陳必謙周鏞雷  
縯祚置之理必謙鏞以是遠曰廣旣連遭誣讎屢疏乞  
休其年九月始得請入辭諸大臣在列曰廣曰微臣觸  
忤權奸自分萬死上恩寬大猶許歸田臣歸後願陛下  
以國事爲重士英熟視曰廣嘗曰我權奸汝且老而賊



也既出復於朝堂相詬詈而罷曰廣骨鯁扼於儉邪不  
竟其用遂歸其後左良玉部將金聲桓者已降於我  
大清既而反江西迎曰廣以資號召聲桓敗曰廣投僕  
家池死周鏞字仲馭金壇人父秦峙雲南布政使鏞舉  
鄉試第一崇禎元年成進士授南京戶部主事權稅蕪  
湖憂歸服闋授南京禮部主事極論內臣言官二事言  
張彝憲用而高弘圖金鉉罷王坤用而魏呈淵趙東曦  
斥鄧希詔用而曹文衡罷問王弘祖李曰輔熊開元罹  
罪每讀邸報半屬內侍溫綸自今鍛鍊臣子委察天言  
祇徇中貴之心臣不知何所極也言官言出禍隨黃道

周諸臣薦賢不效而惠世揚劉宗周勿獲進華允誠諸  
臣驅奸無濟而陳于廷姚希孟鄭三俊皆蒙譴每奉嚴  
諭率皆直臣封章自今播棄忠良獎成宵小祇快奸人  
之計臣益不知何所極矣帝怒斥爲民鏞由是名聞天  
下初鏞世父尚書應秋叔父御史維持以附魏忠賢竝  
麗逆案鏞恥之通籍後卽交東林矯矯樹名節及被放  
與宣城沈壽民讀書茅山廷臣多論薦之十五年起禮  
部主事進郎中爲吏部尚書鄭三俊所倚然爲人好名  
頗飾僞給事中韓如愈疏論之罷歸福王立於南京馬  
士英既逐呂大器以鏞及雷縯祚曾主立潞王議令朱



統鑑劾曰廣因言鑣續祚等皆曰廣私黨請悉置於理遂令逮治而士英劾鑣從弟鍾從逆并及鑣鍾亦逮治阮大鍼居金陵時諸生顧杲等出留都防亂公揭討之主之者鑣也大鍼以故恨鑣鑣獄急屬御史陳丹衷求解於士英爲緝事者所獲丹衷出爲長沙知州於是察處御史羅萬爵希大鍼指上疏痛詆鑣而光祿卿祁逢吉鑣同邑人見人輒詈鑣遂得爲戶部侍郎三何左良玉稱兵檄討士英罪言引用大鍼構陷鑣續祚鍛陳周內士英大鍼益怒大鍼謂鑣實召良玉兵王乃賜鑣續祚自盡鍾棄市雷續祚太湖人崇禎三年舉於鄉十三

年夏帝思破格用人而考選止及進士特命舉人貢生就試教職者悉用爲部寺司屬推官知縣凡二百六十三人號爲庚辰特用而續祚得刑部主事明年三月劾楊嗣昌六大罪可斬鳳陽總督佟大典安慶巡撫鄭三陽河南巡撫高名衡山東巡撫王公弼宜急易帝不悅十五年擢武德道兵備僉事山東被兵續祚守德州有詔獎勵乃疏劾督師范志完縱兵淫掠折除軍餉構結大黨帝心善其言以淫掠事責兵部而令續祚再陳志完者首輔周延儒門生也續祚意有所忌久不奏明年五月延儒下廷議續祚乃奏言志完兩載僉事驟陟督



師非有大黨何以至是大僚則尚書范景文等詞林則  
諭德方拱乾等言路則給事中朱徽沈允培袁彭年等  
皆其黨也方德州被攻不克去掠臨清又五日志完始  
至聞後部破景州則大懼欲避入德州城漏三下邀臣  
議臣不聽志完乃偕流寓詞臣拱乾見臣南城古廟臣  
告以督師非入城官薊州失事由降丁內清志完不憚  
而去若夫座主當朝罔利曲庇隻手有燎原之勢片語  
操生死之權稱功頌德徧於班聯臣不忍見陛下以周  
召待大臣而大臣以嚴嵩薛國觀自待也臣外藩小吏  
乙榜孤蹤不言不敢盡言不敢感陛下虛懷俯納故不

避首輔延儒與舉國媚附時局畧進一言至中樞主計  
請餉必餽常例天下共知他乾沒更無算疏入帝益心  
動命議舊計臣李待問傅淑訓樞臣張國維及戶科荆  
永祚兵科沈迅張嘉言罪而召續祚陛見越數日抵京  
又數日入對召志完拱乾質前疏中語拱乾爲志完辨  
帝頷之問續祚稱功頌德者誰對曰延儒招權納賄如  
起廢清獄蠲租皆自居爲功考選臺諫盡收門下凡求  
總兵巡撫者必先賄幕客董廷獻帝怒逮廷獻誅志完  
而令續祚還任續祚尋以憂去福王時統鎮劾曰廣因  
及之遂逮治明年四月與鏞同賜自盡故事小臣無賜







日身卷三十一  
及傳  
一  
黨與所以全父子之情然必摘發奸謀所以明君臣之義至先皇踐阼蠱惑之計方行藥餌之奸旋發崔文昇投涼劑於積憊之餘李可灼進紅丸於大漸之際法當駢首恩反賜金誰秉國成一至此極若夫鼎湖再泣宗廟之鼎鬯爲重則先帝之簪履爲輕雖神廟鄭妃且先徙以爲望選侍不卽移宮計將安待無何賈繼春以請安選侍被譴慎言抗疏救之帝怒奪俸二年天啟初出督畿輔屯田言天津靜海興濟間沃野萬頃可墾爲田近同知盧觀象墾田三千餘畝其溝洫廬舍之制種植墾濟之方犁然具備可做而行因列上官種佃種民種

軍種屯種五法又言廣寧失守遼人轉徙入關者不下百萬宜招集津門以無家之衆墾不耕之田便詔從之嘗疏薦趙南星劾馮銓銓大恨五年三月愼言假歸銓屬曹欽程論劾誣盜曹縣庫銀三千遂下撫按徵贓編成肅州莊烈帝卽位赦免崇禎元年起故官會當京察請先治媚珥者附逆之罪其他始付考功報可旋擢太僕少卿歷大常卿刑部右侍郎職耿如杞獄不稱旨并尙書韓繼思下吏尋落職歸久之召爲工部右侍郎國用不支廷議開採鼓鑄屯田鹽法諸事愼言屢疏陳奏悉根本計大學士楊嗣昌議改府州縣佐爲練備補總



慎言以更制事大歷陳八議其後卒不能行由左侍郎  
遷南京戶部尚書七疏引疾不允就改吏部尚書掌右  
都御史事十七年三月京師陷五月福王卽位南京命  
慎言理部事上中興十議曰節鎮曰親藩曰開屯曰叛  
逆曰僞命曰褒卹曰功賞曰起廢曰懲貪曰漕稅皆嘉  
納時大起廢籍慎言薦吳牲鄒三俊命牲陛見三俊不  
許大學士高弘圖所擬也勲臣劉孔昭趙之龍等一日  
朝罷羣詣於廷指慎言及牲爲奸邪叱咤徹殿陛給事  
中羅萬象言慎言平生具在彼豈有清望安得指爲奸  
邪孔昭等伏城痛哭謂慎言舉用文臣不及武臣鬻爭

下已又疏劾慎言極詆三俊且謂慎言當迎立時阻難  
懷二心乞寢牲陛見命且議慎言欺蔽罪慎言疏辨因  
乞休萬象又言首膺封爵者四鎮也新政京營又加二  
鎮衛何嘗不用武年來封疆之法先帝多寬武臣武臣  
報先帝者安在祖制以票擬歸閣臣參駁歸言官不聞  
委勲臣以糾劾也使勲臣得兼糾劾文臣可勝逐諫史  
可法奏慎言疏薦無不當諸臣痛哭喧呼滅絕法紀恐  
驕弁悍卒益輕朝廷御史王孫蕃言用人吏部職掌奈  
何廷辱冢宰弘圖等亦以不能戢和文武各疏乞休不  
允牲旣不出慎言乞休得請加太子太保廕一子山西



明史卷一百一十五 及傳 三  
盡陷於賊慎言無家可歸流寓蕪湖宣城間國亡後疽  
發於背戒勿藥卒年六十九慎言少喪二親鞠於祖母  
及爲御史訃聞引義乞歸執喪三年以報子履旋舉崇  
禎十五年鄉試賊陷陽城投崖死事聞贈御史

徐石麒字寶摩嘉興人天啟二年進士授工部營繕主  
事筦節慎庫魏忠賢兼領惜薪司所需悉從庫發石麒  
輒持故事格之其黨譟於庭不爲動御史黃尊素坐忤  
忠賢下詔獄石麒爲盡力忠賢怒執新城侯王昇子下  
獄令誣賄石麒輔繫其家人勒完贖而削其籍崇禎三  
年起南京禮部主事就遷考功郎中八年佐尚書鄭三

俊京察澄汰至公歷尚寶卿應天府丞十一年春入覲  
三俊時爲刑部尚書議侯恂獄不中得罪石麒疏救釋  
之石麒官南京十餘年至是始入爲左通政累遷光祿  
卿通政使十五年擢刑部右侍郎讞吏部尚書李日宣  
等獄帝曰故卜大興日宣稱誦徇私石麒予輕比貶二  
秩先是會推閣臣日宣一再推因及副都御史房可壯  
工部右侍郎宋玫大理寺卿張三謨石麒與焉召對便  
殿石麒獨不赴及是帝怒成日宣及吏科都給事中章  
正宸河南道御史張瑄奪可壯玫三謨及讞獄左侍郎  
惠世揚官石麒代世揚掌部事旋進左當是時帝以威



刑駁下法官引律大抵深文附會于重比石麒麟奉命清獄推明律意校正今斷獄之不合於律者十餘章先以白同官以次審理十三司囚多寬減然廉公一時大法赫然無敢倖免者兵部尚書陳新甲下獄朝士多營救石麒麟持之曰人臣無境外交未有身在朝廷不告君父而專擅便宜者新甲私款辱國當失瀆城寨律斬帝曰未中可覆擬乃論新甲陷邊城四陷腹城七十二陷親藩七從來未有之奇禍當臨敵缺乏不依期進兵策應因而失誤軍機者斬奏上新甲棄市新甲黨皆大恨石麒麟擢本部尚書中官王裕民坐劉元斌黨元斌縱軍

淫掠伏誅裕民以欺隱不舉下獄帝欲殺之初令三法司同鞫後專付刑部石麒麟議戍烟瘴奏成嘗院寺名以進帝怒其失出召詰都御史劉宗周對曰此獄非臣讞徐曰臣雖不與聞然閱讞詞已曲盡情事刑官所執者法耳法如是止石麒麟非私裕民也帝曰此奴欺罔實甚卿等焉知令石麒麟改讞詞棄之市無何宗周以救姜埰熊開元獲嚴譴僉都御史金光辰救之奪職石麒麟再疏留不納埰開元既下詔獄移刑部定罪石麒麟據原詞擬開元贖徒埰謫戍不復鞫訊帝責對狀石麒麟援故事對帝大怒除司官三人名石麒麟落職閒住福王監國召拜



右都御史未任改吏部尙書奏陳省庶官慎破格行久  
任重名器嚴起廢明保舉交堂廉七事時方考選與都  
御史劉宗周矢公甄別以年例出御史黃耳鼎給事中  
陸朗於外朗賄奄人得留用石麒發其罪朗恚詆石麒  
石麒稱疾乞休耳鼎亦兩疏劾石麒并言其枉殺陳新  
甲石麒疏辯求去益力馬士英擬嚴旨福王不許命馳  
驛歸石麒剛方清介扼於權奸悒悒不得志士英挾定  
策功將圖封石麒議格之中官田成輩納賄請囑石麒  
悉拒不應由是中外皆怨憤之士去後以登極恩加大  
子太保明年南都亡石麒時居郡城外城將破石麒曰  
吾大臣也城亡與亡復入居城中以閏月二十六日朝  
服自縊死年六十有八

解學龍字石帆揚州興化人萬曆四十一年進士歷金  
華東昌二府推官天啟二年擢刑科給事中遼東難民  
多渡海聚登州招練劉綎請帑金十萬振之多  
所乾後學龍三疏請其罪國縉遂獲譴王紀許魏忠賢  
削籍學龍言紀亮等罪猷召賓廓廟必能表王自察裁  
決大務失忠賢意不報已劾川貴舊總督張我續貪淫  
漏網新總督楊述中縮朒卸責帝不罪學龍通曉政務  
上言遼左額兵舊九萬四千有奇歲餉四十餘萬今因



上兵止十餘萬月餉乃二十二萬遼兵盡潰關門宜募新兵薊鎮舊有額兵乃亦給厚精召募舊兵以其餉厚悉竄入新營而舊額又如故漏卮可勝言國初文職五千四百有奇武職二萬八千有奇神祖時文增至一萬六千餘武增至八萬二千餘矣今不知又增幾倍誠度冗者汰之歲可得餉數十萬裁冗吏核曠卒俾衛所應襲子弟襲職而不給俸又可得數十萬京邊米一石民輸則非一石也以民之費與國之收衷之國之一民之三關餉一斛銀四錢以易錢則好米值錢百惡米止三四十錢又其下腐臭不可食以國之費與兵之食衷之

兵之一國之三總計之民費其六而兵食其一况小民作奸欺漕卒漕卒欺官司官司欺天子展轉相欺米已化爲糠粃沙土兼濕熱蒸變食不可咽是又化有用之六爲無用之一矣臣以爲莫如修屯政屯政修則地闢而民有樂土粟積而人有固志昔吳璘守天水縱橫鑿渠綿亘不絕名曰地網敵騎不能逞今倣其制溝涂之界各樹土所宜木小可獲薪果之饒大可得抗扼之利敵雖強何施乎帝亟下所司而議竟中格稍進右給事中五年九月御史智鋌劾學龍及編修侯恪爲東林鷹犬遂削籍崇禎元年起歷戶科都給事中以民貧盜起



請大清吏治尋劾薊撫王應豸剋餉激變又上足餉十六事帝皆採納遷太常少卿太僕卿五年改右僉都御史巡撫江西疏言臣所部州縣七十八而坐逋賦降罰者至九十人由數歲之逋責於一歲數人之逋責於一人故終無及額之日也請別新舊酌多寡立帶徵之法可之四方盜賊蠡起江西獨無重兵學龍以爲言詔增置千人討平都昌萍鄉諸盜合閩兵擊破封山妖賊張普薇等賊遂殄滅十二年冬擢南京兵部右侍郎明年春將解任遵例薦舉屬吏并及遷謫官黃道周帝怒徵下獄責其黨庇行私廷杖八十削其籍移入詔獄竟坐

遣戍十五年秋道周召還半道請釋學龍不聽十七年五月福王立於南京召拜兵部左侍郎十月擢刑部尚書時方治從賊之獄倣唐制六等定罪學龍議定以十二月上之其一等應磔者吏部員外郎宋企郊舉入牛金星平陽知府張麟然太僕少卿曹欽程御史李振聲喻上猷山西提學參議黎志陞陝西左布政使陸之祺兵科給事中高翔漢潼關道僉事楊王休翰林院檢討劉世芳十一人也二等應斬秋決者刑科給事中光時亨河南提學僉事鞏脩庶吉士周鍾兵部主事方允昌四人也三等應絞擬贖者翰林修撰兼戶兵二科都給



事中陳名夏戶科給事中楊枝起廖國遴襄陽知府王承曾天津兵備副使原毓宗庶吉士何孕光少詹事項煜七人也四等應戊擬贖者禮部主事王孫蕙翰林院檢討梁兆陽大理寺正錢位坤總督侍郎侯恂山西副使王秉鑑御史陳羽白裴希度張懋爵禮部郎中劉大鞏吏部員外郎郭萬象給事中申芝芳金汝礪舉人吳達修撰楊廷鑑及黃繼祖十五人也五等應徒擬贖者通政司參議宋學顯諭德方拱乾工部主事繆沅給事中呂兆龍傅振鐸進士吳剛思檢討方以智傅鼎銓庶吉士張家玉及沈元龍十人也六等應杖擬贖者工部

員外郎潘同春禮部員外郎吳泰來主事張琦行人王于躍行取知縣周壽明進士徐家麟及向列星李桐八人也其留北俟後定奪者少詹事何瑞徵楊觀光太僕少卿張若麒副使方大猷戶部侍郎黨崇雅吏部侍郎熊文舉太僕卿葉初壽給事中龔鼎孳戴明說孫承澤劉昌御史涂必泓張鳴駿司業薛所蘊通政參議趙京仕編修高爾儼戶部郎中衛胃詐及黃紀孫襄十九人也其另存再議者給事中翁元益郭充庶吉士魯棗吳爾壘史可程王自超白孕謙梁清標楊棲鸚張元琳呂崇烈李化麟朱積趙頰劉廷琮吏部郎中侯佐員外郎



明史卷二百一十五 列傳 九  
左懋泰禮部郎中吳之琦兵部員外郎鄒明魁行人許  
作梅進士胡顯太常博士龔懋熙及王之牧王臯梅鶚  
姬琨朱國壽吳嵩孕二十八人也其已奉旨錄用者兵  
部尚書張縉彥給事中時敏諭德衛孕文韓四維御史  
蘇京行取知縣黃國琦施鳳儀兵部郎中張正聲內閣  
中書舍人顧大成及姜荃林等十人也得旨周鍾等不  
當緩決陳名夏等未蔽厥辜侯恂宋學顯吳剛思方以  
智潘同春等擬罪未合新榜進士盡汚偽命不當復玷  
班聯令再議惟方拱乾結納馬阮特旨免其罪明年正  
月學龍奉詔擬周鍾光時亨等各加一等潘同春諸臣

皆候補小臣受偽無據仍執前律當是時馬阮必欲殺  
周鍾學龍欲縶之死謀之次輔王鐸乘士英注籍上之  
且請停刑鐸卽封前旨褒以詳慎平允士英聞之大怒  
然事已無及大鉞暨其黨張捷楊維垣聲言欲劾學龍  
學龍引疾命未下保國公朱國弼御史張孫振等詆其  
曲庇行私遂削籍大鉞既殺鍾時亨卽傳旨二等罪斬  
者謫充雲南金齒軍三等罪絞者充廣西邊衛軍四等  
以下俱爲民永不敘用然學龍所定案亦多漏網而所  
擬一等諸犯皆隨賊西行實未嘗正刑辟也黃繼祖沈  
元龍向列星李桐黃紀孫襄王之牧王臯梅鶚姬琨朱



國壽吳嵩孕姜荃林皆朱詳其官學龍歸南都旋失久之卒於家

高倬字枝樓忠州人天啟五年進士除德清知縣調金華崇禎四年徵授御史薊遼總督曹文衡與總監鄧希詔相訐奏詔殫力幹濟以副委任倬乃上疏言文衡骯髒成性必不能仰鼻息於中官希詔睚眦未忘何能化戈矛爲同氣封疆事重宜撤希詔安文衡心若文衡不足用宜更置勿使中官參之請邊鎮臣如希詔不少使人效希詔督撫之展布益難卽請邊督撫如文衡亦不少使人效文衡將邊事之廢壞愈甚疏入貶一秩視事

巡視草場坐失火下吏廷臣申救不納逾年熱審給事中吳甘來以爲言始釋歸起上林署丞卽遷大理右寺副十一年五月火星逆行詔修省倬以近者刑獄滋繁法官務停閣請赦諸司尅期奏報大者旬小者五日其奉旨覆讞者或五日三日務俾積案盡疏罔囿衰減帝爲採納屢遷南京太僕卿太僕故駐滁州滁爲南都西北門戶請募州人爲兵保障鄉土從之十六年二月擢右僉都御史提督操江其秋操江改任武臣劉孔昭召倬別用未赴而京師陷福王立南京拜倬工部右侍郎御用監內官請給工料銀置龍鳳几榻諸器物及宮殿



陳設金玉諸寶計貲數十萬倬請裁省光祿寺辦御用器至萬五千七百有奇倬又以為言皆不納明年二月山左侍郎拜刑部尚書國破倬投繯死是時大臣殉難者倬與張捷楊維垣庶僚則有黃端伯劉成治吳嘉允龔廷祥瑞伯字元公建昌新城人崇禎元年進士歷寧波杭州二府推官行取赴都母憂歸服闋入都疏陳益王居建昌不法狀王亦劾端伯離間親藩及出妻酗酒諸事有詔候勘避居廬山福王立大學士姜曰廣薦起之明年三月授儀制主事五月南都破百官皆迎降端伯不出捕繫之閏四月諭之降不從卒就戮成治字貴

如陽人崇禎七年進士福王時歷官戶部郎中國破忻城伯趙之龍將出降入戶部封府庫成治憤手搏之之龍跳而免成治自經嘉允字繩如松江華亭人由鄉舉歷官戶部主事奉使出都聞變還南方孝孺祠投繯死廷祥字伯興無錫人馬世奇門人也崇禎十六年進士為中書舍人城破衣冠步至武定橋投水死時又有欽天監博士陳子階國子生吳可箕武舉黃金璽布衣陳士達並死焉

左懋第字蘿石萊陽人崇禎四年進士授韓城知縣有異政遭父喪三年不入內寢事母盡孝十二年擢戶科



明史卷三百五十五 文傳 三  
給事中疏陳四弊謂民困兵弱臣工委頓國計虛耗也  
又陳貴粟之策令天下贖罪者盡輸粟鹽筴復開中之  
舊令輸粟邊塞充軍食彗星見詔停刑懋第請馬上速  
傳又請嚴禁將士剽掠有司股削請散米錢振輦下饑  
民救養嬰孩明年正月勸餉罷徵亦請馬上速行恐遠  
方吏不知先已徵民不沾實惠帝並採納三月大風霾  
帝布袍齋居禱之不止懋第言去秋星變朝停刑而夕  
卽滅今者不然豈陛下有其文未修其實乎臣敢以實  
進練餉之加原非得已乃明旨減兵以省餉天下共知  
之而餉猶未省何也請自今因兵徵餉預使天下知應

加之數官吏無所逞其才以信陛下之明詔而刑獄則  
以睿慮之疑信定諸囚之死生諸疑於心與疑信半者  
悉從輕典豈停刑可止彗解網不可以返風乎且陛下  
屢沛大恩四方死者猶枕藉盜賊未見衰止何也由獨  
停者止一二存留之賦有司迫考成催徵未敢緩是以  
莫救於凶荒請於極荒州縣下詔速停有司息訟專以  
救荒爲務帝曰然於是上災七十五州縣新舊練三餉  
並停中災六十八州縣止徵練餉下災二十八州縣秋  
成督徵十四年督催漕運道中馳疏言臣自靜海抵臨  
清見人民饑死者三疫死者二爲盜者四米石銀二十



四兩人死取以食惟聖明垂念又言臣自魚臺至南陽  
流寇殺戮村市爲墟其他饑疫死者屍積水涯河爲不  
流振林安可不速已又陳安民息盜之策請核荒田察  
適戶予以有生之樂鼓其耕種之心又言臣有事河干  
一載每進父老問疾苦皆言練餉之害三年來農怨於  
野商嘆於途如此重派所練何兵兵在何所勦賊禦邊  
致安在奈何使眾心瓦解一至此極乎又言臣去冬抵  
宿遷見督漕臣史可法言山東米石二十兩而河南乃  
至百五十兩漕儲多適朝議不收折色需本色今淮鳳  
間麥大熟如收兩地折色易麥轉輸豈不大利昔劉晏

河轉易之法今歲河北大稔山東東兗二郡亦有收誠  
出內帑二三十萬分發所司及時收糴於國計便帝卽  
命議行屢遷刑科左給事中十六年秋出察江防明年  
五月福王立進兵科都給事中旋擢右僉都御史巡撫  
應天徽州諸府時

大清兵連破李自成朝議遣使通好而難其人懋第母  
陳歿於燕懋第欲因是返匱葬請行乃拜懋第兵部右  
侍郎兼右僉都御史與左都督陳弘範太僕少卿馬紹  
愉偕而令懋第經理河北聯絡關東諸軍馬紹愉者故  
兵部郎官也嘗爲陳新甲通款事至義州而還新甲旣



誅紹愉以督戰致衄爲懋第劾罷及是紹愉已起官郎  
中乃進爲少卿副懋第懋第言臣此行致祭先帝后梓  
宮訪東宮二王蹤跡臣旣充使臣勢不能兼理封疆臣  
紹愉臣所劾罷不當復與臣共事必用臣經理則乞命  
弘範同紹愉出使而假臣一旅偕山東撫臣收拾山東  
以待不敢復言北行如用臣與弘範北行則去臣經理  
但銜命而往而罷紹愉勿遣閣部議止紹愉改命原任  
薊督王永吉王令仍遵前諭懋第瀕行言臣此行生死  
未卜請以辭闕之身效一言願陛下以先帝仇恥爲心  
瞻高皇之弓劔則思成祖列聖之陵寢何存撫江上之

殘黎則念河北山東之赤子誰卹更望時時整頓上馬  
必能渡河而戰始能扼河而守必能扼河而守始能盡  
江而安衆聽其言王令齎白金十萬兩幣帛數萬匹以  
兵三千人護行八月舟渡淮十月朔次張家灣  
本朝傳令止許百人從行懋第衰絰入都門至則館之  
鴻臚寺請祭告諸陵及改葬先帝不可則陳太宰於旅  
所哭而奠之卽以是月二十有八日遣還出都弘範乃  
請身赴江南招諸將劉澤清等降附而留懋第等勿遣  
於是自滄州追還懋第改館太醫院  
順治二年六月聞南京失守慟哭其從弟懋泰先爲吏



明史卷二百一十五 列傳 五十五  
部員外郎降賊後歸

本朝授官矣來謁懋第懋第曰此非吾弟也叱出之至閏月十二日與從行兵部司務陳用極游擊王一斌都司張良佐劉統士廷佐俱以不降誅而紹愉獲免

郝彪佳字弘吉浙江山陰人祖父世清白吏彪佳生而英特于姿絕人弱冠第天啓二年進士授興化府推官始至吏民易其年少及治事剖決精明皆大畏服外艱歸崇禎四年起御史疏陳賞罰之要言黜功因一級疑稽三年之叙且恩及督撫總帥帷幄大臣而陷敵衝鋒之士不預何以勵行間山東之變六城連陷未嘗議及

一官欺蒙之習不可不破帝卽命議行又言九列之長詰責時聞四朝遺老或蒙重譴諸臣休嚴威競迎合以保名位臣所慮於大臣者此也方伯或一二考臺員或十餘載竟不得遷除監司守令多貶秩停俸臣子精神才具無餘地展布曷由急功赴名之心不勝其掩罪匿瑕臣所慮於小臣者此也國家聞鞀鼓思將帥苟得其人推轂築壇禮亦宜之若必依序循資冒濫之竇雖可清獎拔之術或未盡臣所慮於武臣者此也撫按則使中官監視會同隙開水火其患顯潛通交結其患深臣所慮於內臣者此也忤旨譴責尋上合籌天下全局疏



以策關寧制登海爲二大要分析中州秦晉之流賊江  
右楚粵之山賊浙閩東粵之海賊滇黔楚蜀之土賊爲  
四大勢極控制駕馭之宜而歸其要於戢行伍以節餉  
實衛所以銷兵復陳民間十四大苦曰里甲曰虛糧曰  
行戶曰搜賊曰欽提曰隔提曰訐訟曰窩訪曰私稅曰  
私鑄曰解運曰馬戶曰鹽丁曰難民帝善其言下之所  
司出按蘇松諸府廉積猾四人杖殺之宜興民發首輔  
周延儒祖墓又焚翰林陳于鼎于泰慮亦發其祖墓彪  
佳捕治如法而於延儒無所徇延儒憾之回道考覈降  
俸尋以侍養歸家居九年母服終召掌河南道事十六

年任大計則遺莫敢及門刷卷南畿乞休不允便道還  
家北都變聞謁福王於南京王監國或請登極彪往請  
發喪服滿議其儀從之高傑兵擾揚州民奔避江南奸  
民乘機剽斂命彪往宣諭新倡亂者數人一方遂安  
遷大理寺丞旋擢右僉都御史巡撫江南蘇州諸生微  
討其鄉官從賊者奸民和之少詹事項煜及大理寺正  
錢位坤通政司叅議宋學顯禮部員外郎湯有慶之家  
皆被焚劫常熟又焚給事中時敏家燬其三代四棺彪  
往請議從逆諸臣罪而治焚掠之徒以加等從之詔設  
廠衛緝事官彪佳上言洪武初官民有犯或收繫錦衣



衛高皇帝見非法凌虐焚其刑具送囚刑部是祖制原  
無詔獄也後乃以羅織爲事雖曰朝廷瓜牙實爲權奸  
鷹狗舉朝盡知其枉而法司無敢雪慘酷等來周平反  
無徐杜此詔獄之弊也洪武十五年改儀鑾司爲錦衣  
衛端掌直駕侍衛等事未嘗令緝事也永樂間設立東  
廠始開告密門兇人投爲厮役赤手鉅萬飛誣及於善  
良招承出於私拷怨憤滿乎京畿欲絕苞苴而苞苴彌  
盛欲清奸宄而奸宄益多此緝事之弊也古者刑不上  
大夫逆瑾用事始去衣受杖本無可殺之罪乃蒙必死  
之刑朝廷受愆諫之名天下反歸患直之譽此廷杖之

弊也疏奏乃命五城御史體訪而緝事官不設督輔部  
將劉肇基陳可立張應夢于永綬駐京口浙江入衛都  
司黃之奎亦部水陸兵三四千戍其地之奎御軍嚴四  
將兵恣橫刃傷民浙兵縛而投之江遂有隙已而守備  
李大開統浙兵斫鎮兵馬鎮兵與相擊射殺大開亂兵  
大焚掠死者四百人彪佳至永綬等遁去彪佳劾治四  
將罪黜卹被難家民大悅高傑駐瓜洲跋扈甚彪佳尅  
期往會至期風大作傑意彪佳必無來彪佳攜數卒衝  
風渡傑大駭異盡撤兵衛會彪佳於大觀樓彪佳披肝  
膈勉以忠義共獎王室傑感歎曰傑閱人多矣如公傑





甘爲死公一日在吳傑二自遵公約矣共飯而別羣小  
疾彪佳競詆譏以沮登極立潞王爲言彪佳竟移疾去  
明年五月南都失守六月杭州繼失彪佳卽絕粒至閏  
月四日給家人先寢端坐池中而死年四十有四唐王  
贈少保兵部尚書諡忠敏

贊曰張慎言徐石麟等皆北都舊臣剛方練達所建白  
悉有裨時政令其受事熙朝從容展布庶幾乎列卿之  
良也而遭時不造內外交訌動輒詆譭雖老成何能設  
施幹濟哉左懋第仗節全貞隋死不悔於奉使之義亦  
無愧焉



